


# 遼史




|      |   |   |   |
|------|---|---|---|
| 漢書門類 |   |   |   |
| 五    | 六 | 〇 | 六 |
| 四    | 六 | 〇 | 六 |
| 一    | 六 | 〇 | 六 |
| 二    | 〇 | 〇 | 〇 |
| 冊    | 架 | 函 | 號 |

|      |   |   |   |
|------|---|---|---|
| 內閣文庫 |   |   |   |
| 五    | 六 | 〇 | 六 |
| 一    | 六 | 〇 | 六 |
| 二    | 〇 | 〇 | 〇 |
| 函    | 架 | 冊 | 號 |
| 漢    | 書 |   |   |

|      |     |      |  |
|------|-----|------|--|
| 內閣文庫 |     |      |  |
| 番號   | 漢   | 5606 |  |
| 冊數   | 12  | (11) |  |
| 函號   | 281 | 27   |  |





遼史卷八十六

列傳第十六

淺草文庫

元開府儀同三司上柱國前中書令兼修國史都總裁脫脫修  
皇明奉訓大夫右春坊左諭德兼翰林院講官國子監事臣沈淮等  
奉

勅重校刊

耶律合住

劉景

劉六符

耶律裊履

牛溫舒

杜防

蕭和尚

特末

耶律合理只

耶律頗的

耶律合住字粘衮太祖弟迭刺之孫幼不好弄臨事明敏善談論初以近族入侍每從征伐有功保寧初加右龍虎衛上將軍以宋師屢梗南邊拜涿州刺史西南兵馬都監招安巡檢等使賜推忠奉國功臣合住久任邊防雖有克獲功然務鎮靜不妄生事以邀近功鄰壤敬畏屬部又安宋數遣人結歡冀達和意合住表聞其事帝許議和安邊懷敵多有力馬拜左金吾衛上將軍秩滿遙攝鎮國軍節度使卒合住智而有文曉暢戎政鎮范陽時嘗領數騎徑詣雄州北門與郡將立馬陳兩國利害及周師侵邊本末辭氣慷慨左右壯之自是邊境數年無事識者以謂合住一言賢於數十萬兵

劉景字可大河間人四世祖怱即木滔之甥唐右僕射盧龍軍節度使父守敬南京副留守景資端厚好學能文燕王趙延壽辟爲幽都府文學應曆初遷右拾遺知制誥爲翰林學士九年周人侵燕留守蕭思溫上急變帝欲俟秋出師景諫曰河北三關已陷于敵今復侵燕安可坐視上不聽會父憂去未幾起復舊職一日召草赦旣成留數月不出景奏曰唐制赦書日行五百里今稽期弗發非也上亦不報景宗卽位以景忠實擢禮部侍郎遷尚書宣政殿學士上方欲倚用乃書其笏曰劉

景可爲宰相頃之爲南京副留守時留守韓匡嗣因扈  
從北上景與其子德讓共理京事俄召爲戶部使歷武  
定開遠二軍節度使統和六年致仕加兼侍中卒年六  
十七贈太子太師子慎行孫一德二玄三嘏四端五常  
六符皆具六符傳

劉六符父慎行由膳部員外郎累遷至北府宰相監修  
國史時上多卽宴飲行誅賞慎行諫曰以喜怒加威福  
恐未當帝悟諭政府自今宴飲有刑賞事翌日稟行爲  
都統伐高麗以失軍期下吏議貴乃免出爲彰武軍節  
度使賜保節功臣子六人一德二玄三嘏四端五常六

符德早世玄終上京留守常歷三司使武定軍節度使  
嘏端符皆第進士嘏端俱尚主爲駙馬都尉三嘏獻聖  
宗一矢斃雙鹿賦上嘉其贍麗與公主不諧奔宋歸殺  
之四端以衛尉少卿使宋賀生辰方宴大張女樂竟席  
不顧人憚其嚴還拜樞密直學士六符有志操能文重  
熙初遷政事舍人擢翰林學士十一年與宣徽使蕭特  
未使宋索十縣地還爲漢人行宮副部署會宋遣使增  
歲幣以易十縣復與耶律仁先使宋定進貢名宋難之  
六符曰本朝兵彊將勇海內共知人人願從事于宋若  
恣其俘獲以飽所欲與進貢字孰多况大兵駐燕萬一

南進何以禦之顧小節忘大患悔將何及宋乃從之歲幣稱貢六符還加同中書門下平章事及宋幣至命六符爲三司使以受之六符與參知政事杜防有隙防以六符嘗受宋賂白其事出爲長寧軍節度使俄召爲三司使道宗卽位將行大冊禮北院樞密使蕭革曰行大禮備儀物必擇廣地莫若黃川六符曰不然禮儀國之大體帝王之樂不奏于野今中京四方之極朝覲各得其所宜中京行之上從其議尋以疾卒

耶律裊履字海隣六院夷离董蒲古只之後風神爽秀王子畫重熙間累遷同知點檢司事駙馬都尉蕭胡覲爲夏人所執奉詔索之三返以歸轉永興宮使右祗候郎君班詳穩裊履將娶秦晉長公主孫其母與公主婢有隙謂裊履曰能去婢乃許爾婚裊履以計殺之婚成事覺有司以大辟論裊履善畫寫聖宗直以獻得減坐長流邊戍復以寫真召拜同知南院宣徽事使宋賀正寫宋主容以歸清寧間復使宋宋主賜宴瓶花隔面未得其真陛辭僅一視及境以像示餞者駭其神妙聞重元死不卽勤王賊平入賀帝責讓之宴酣顧裊履曰重元事成卿必得爲上客裊履大慙咸雍中加太子太師卒

牛温舒范陽人剛正尚節義有遠器咸雍中擢進士第  
滯小官大安初累遷戶部使轉給事中知三司使事國  
民兼足上以爲能加戶部侍郎改三司使壽隆中拜參  
知政事兼同知樞密院事攝中京留守部民請闕請真  
拜從之召爲三司使乾統初復參知政事知南院樞密  
使事五年夏爲宋所攻來請和解温舒與蕭得里底使  
宋方大燕優人爲道士裝索土泥藥爐優曰土少不能  
和温舒遽起以手籍土懷之宋主問其故温舒對曰臣  
奉天子威命來和若不從則當卷土收去宋人大驚遂  
許夏和還加中書令卒

杜防涿州歸義縣人開泰五年擢進士甲科累遷起居  
郎知制誥人以爲有宰相器太平中遷政事舍人拜樞  
密副使重熙九年夏人侵宋宋遣郭禎來告請與夏和  
上命防使夏解之如約罷兵各歸侵地拜參知政事韓  
紹芳劉六符忌之防待以誠十二年紹芳等罷愈見信  
任十二年拜南府宰相防生子帝幸其第賜名王門奴  
以進奏有誤出爲武定軍節度使十四年復召爲南府  
宰相二十一年秋祭仁德皇后詔儒臣賦詩防爲魁賜  
金帶道宗諒陰爲大行皇帝山陵使清寧二年上諭防  
曰朕以卿年老嗜酒不欲煩以劇務朝廷之事總綱而

已頃之拜右丞相加尚父卒上歎悼不已賜贈加等官給葬具贈中書令諡曰元肅子公謂終南府宰相

蕭和尚字洪寧國舅大父房之後忠直多志畧開泰初補玉盞郎君尋爲內史太醫等局都林牙使宋賀正將宴典儀者告班節度使下和尚曰班次如此是不以大國之使相禮且以錦服爲貺如待蕃部若果如是吾不預宴宋臣不能對易以紫服位視執政使禮始定八年秋爲唐古部節度使卒第特末

特末字何寧爲人機辨任氣太平中累遷安東軍節度使有能稱十一年召爲左祗候郎君班詳穩未幾遷左夷裔畢重熙十年累遷北院宣徽使劉六符使宋索十縣故地末請增銀絹十萬兩足以易之歸稱旨加同政事門下平章事詔城西南渾底甸還復爲北院宣徽使卒

耶律合里只字特滿六院夷裔董蒲古只之後重熙中累遷西南面招討都監克宋國生辰使館于白溝驛宋宴勞優者嘲蕭惠河西之敗合里只曰勝負兵家常事我嗣聖皇帝俘石重貴至今興中有石家寨惠之一敗何足較哉宋人慚服帝聞之曰優伶失辭何可傷兩國交好鞭二百免官清寧初起爲懷化軍節度使七年入



爲北院大王封幽國公歷遼興軍節度使東北路詳穩  
加兼侍中致仕卒合里只明達勤恪懷柔有道置諸賓  
館及西邊營田皆自合里只發之

耶律頗的字撒版季父房奴瓜之孫孤介寡合重熙初  
補牌印郎君清寧初稍遷知易州去官部民請留許之  
咸雍八年改彰國軍節度使上獵大宰古山頗的謁于  
行宮帝問邊事對曰自應州南境至天池皆我耕牧之  
地清寧間邊將不謹爲宋所侵烽堠內移似非所宜道  
宗然之拜比面林牙後遣人使宋得其侵地命頗的往  
定疆界還拜南院宣徽使太康四年遷忠順軍節度使

尋爲南院大王改同知南京留守事召拜南府宰相賜  
貞良功臣封吳國公爲北院樞密使廉謹奉公知無不  
爲大安中致仕卒子霞抹北院樞密副使

論曰耶律合住安邊講好養兵息民其慮深遠矣六符  
啓釁邀功豈國家之利哉牛杜頗的合里只輩銜命出  
使幸不辱命褻履殺人婢以求婚身負罪釁畫其主容  
以冀免死亦可醜也

遼史卷八十六終

遼史卷八十七

列傳第十七

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奉

勅重校刊

蕭孝穆

撒八 孝友

孝先

蕭蒲奴

耶律蒲古

夏行美

蕭孝穆小字胡獨董淳欽皇后弟阿古只五世孫父陶  
瑰為國舅詳穩孝穆廉謹有禮法統和二十八年累遷  
西北路招討都監開泰元年遙授建雄軍節度使加檢

校太保是年木烈等變孝穆擊走之冬進軍可敦城阻  
卜結五羣牧長查刺阿覩等謀中外相應孝穆悉誅之  
迺嚴備禦以待餘黨遂潰以功遷九水諸部安撫使尋  
拜北府宰相賜忠穆熙霸功臣檢校太師同政事門下  
平章事八年還京師太平二年知樞密院事充漢人行  
宮都部署三年封燕王南京留守兵馬都總管九年大  
延琳以東京叛孝穆爲都統討之戰于蒲水中軍稍却  
副部署蕭匹敵都監蕭蒲奴以兩翼夾擊賊潰追敗之  
于手山北延琳走入城深溝自衛孝穆圍之築重城起  
樓櫓使內外不相通城中撤屋以爨其將楊詳世等擒  
延琳以降遼東悉平改東京留守賜佐國功臣爲政務  
寬簡撫納流徙其民安之興宗卽位徙王秦尋復爲南  
京留守重熙六年進封吳國王拜北院樞密使八年表  
請籍天下戶口以均徭役又陳諸部及舍利軍利害從  
之繇是政賦稍平衆悅九年徙王楚時天下無事戶口  
蕃息上富于春秋每言及周取十縣慨然有南伐之志  
群臣多順旨孝穆諫曰昔太祖南伐終以無功嗣聖皇  
帝仆唐立晉後以重貴叛長驅入汴鑿馭始旋反來侵  
軼自後連兵二十餘年僅得和好蒸民樂業南北相通  
今國家比之曩日雖曰富疆然勲臣宿將往往物故且

宋人無罪陛下不宜棄先帝盟約時上意已決書奏不報以年老乞骸骨不許十一年復爲北院樞密使更王齊薨追贈大丞相晉國王諡曰貞孝穆雖椒房親位高益畏太后有賜輒辭不受妻子無驕色與人交始終如一所薦拔皆忠直士嘗語人曰樞密選賢而用何事不濟若自親煩碎則大事凝滯矣自蕭合卓以吏才進其後轉効不知大體歎曰不能移風易俗偷安爵位臣子之道若是乎時稱爲國寶臣目所著文曰寶老集二子阿刺撒八弟孝先孝忠孝友各有傳

撒八字周隱七歲以戚屬加左右千牛衛大將軍重熙初補祗候郎君性廉介風姿爽朗善毬馬馳射帝每燕飲喜諧謔撒八雖承寵顧常以禮自持時人稱之以柴冊禮恩加檢校大傅永興宮使總領左右護衛同知點檢司事尚魏國公主拜駙馬都尉爲北院宣徽使仍總知朝廷禮儀重熙末出爲西北路招討使武寧郡王居官以治稱清寧初薨年三十九追封齊王

孝先字延寧小字海里統和十八年補祗候郎君尚南陽公主拜駙馬都尉開泰五年爲國舅詳穩將兵城東鄙還爲南京統軍使太平三年爲漢人行宮都部署尋加太子太傅五年遷上京留守以母老求侍復爲國舅

詳穩改東京留守會大延琳反被圍數月穴地而出延  
琳平留守上京十一年帝不豫欽哀召孝先總禁衛事  
興宗諒陰欽哀弒仁德皇后孝先與蕭浞卜蕭匹敵等  
謀居多及欽哀攝政遙授天平軍節度使加守司徒兼  
政事令重熙初封楚王爲北院樞密使孝先以椒房親  
爲太后所重在樞府好惡自恣權傾人主朝多側目二  
年太后與孝先謀廢立事帝知之勒衛兵出宮召孝先  
至諭以廢太后意孝先震懾不能對遷太后于慶州孝  
先恒鬱鬱不樂四年徙王晉後爲南京留守卒謚忠肅  
孝友字撻不衍小字陳留開泰初以戚屬爲小將軍太  
平元年以大冊加左武衛大將軍檢校太保賜名孝友  
重熙元年累遷西北路招討使封蘭陵郡王八年進王  
陳先是蕭惠爲招討使專以威制西羗諸夷多叛孝友  
下車厚加綏撫每入貢輒增其賜物羗人以妥久之寢  
成姑息諸夷桀驁之風遂熾議者譏其過中十年加政  
事令賜劾節宣庸定遠功臣更王吳後以葬兄孝穆孝  
忠還京師拜南院樞密使加賜翊聖協穆保義功臣進  
王趙拜中書令丁母憂起復北府宰相出知東京留守  
會伐夏孝友與樞密使蕭惠失利河南帝欲誅之太后  
救免復爲東京留守徙王燕改上京留守更王秦清寧

初加尚父頃之復留守東京明年復爲北府宰相帝親製誥詞以褒寵之以柴冊恩遙授洛京留守益賜純德功臣致仕進封豐國王坐子胡覩首與重元亂伏誅年七十三胡覩在逆臣傳

蕭蒲奴字留隱奚王楚不寧之後幼孤貧傭于醫家牧牛傷人稼數遭笞辱醫者嘗見蒲奴熟寐有蛇遶身異之教以讀書聰敏嗜學不數年涉獵經史習騎射旣冠意氣豪邁開泰間選充護衛稍進用俄坐罪黜流烏古部久之召還累任劇遷奚六部大王治有聲太平九年大延琳據東京叛蒲奴爲都監將右翼軍遇賊戰蒲水

中軍少却蒲奴與左翼軍夾攻之先據高麗女直要衝使不得求援又敗賊于手山延琳走入城蒲奴不介馬而馳追殺餘賊已而大軍圍東京蒲奴討諸叛邑平乳山賊延琳堅守不敢出旣被擒蒲奴以功加兼侍中重熙六年改北阻卜副部署再授奚六部大王十五年爲西南面招討使西征夏國蒲奴以兵二千據河橋聚巨艦數十艘仍作大鉤人莫測戰之日布舟于河綿亘三十餘里遣人伺上流有浮物輒取之大軍旣失利蒲奴未知適有大水順流而下勢將壞浮梁斷歸路操舟者爭鉤致之橋得不壞明年復西征懸兵深入大掠而還

復爲奚六部大王致仕卒

耶律蒲古字提隱太祖弟蘓之四世孫以武勇稱統和初爲涿州刺史從伐高麗有功開泰末爲上京內客省副使太平二年城鴨綠江蒲古守之在鎮有治績五年改廣德軍節度使尋遷東京統軍使莅政嚴肅諸部懾服九年大延琳叛以書結保州夏行美執其人送蒲古蒲古人據保州延琳氣沮以功拜惕隱十一年爲子鐵驪所弒

夏行美渤海人太平九年大延琳叛時行美總渤海軍于保州延琳使人說欲與俱叛行美執送統軍耶律蒲古又誘賊黨百人殺之延琳謀沮廼嬰城自守數月而破以功加同政事門下平章事錫賚甚厚明年擢忠順軍節度使重熙十七年遷副部署從點檢耶律義先討蒲奴聖獲其酋陶得里以歸致仕卒上思其功遣使祭于家

論曰不有君子其能國乎方其擒延琳定遼東一時諸將之功偉矣宜其撫劔抵掌賈餘勇以威天下也蕭孝穆之諫南侵其意防何其弘遠歟是豈瞋目語難者所能知哉至論移風俗爲治之本親煩碎爲失大臣體又何其深切著明也爲國寶臣宜矣孝先預弒仁德之謀

猶依城社以逃熏灌爲國巨蠹雖勅何議焉

遼史卷八十七終

遼史卷八十八

列傳第十八

元開府儀同三司上柱國前中書右丞相兼修國史都總裁脫脫修

皇明奉訓大夫右春坊右諭德兼翰林院侍講學士監事臣沈灌等

奉

勅重校刊

蕭敵烈

拔刺

耶律盆奴

蕭排押

恒德

匹敵

耶律資忠

耶律瑤質

耶律弘古

高正

耶律的琿

大康父



蕭敵烈字涅魯衮宰相撻烈四世孫識度弘遠爲鄉里  
推重始爲牛羣敵史帝聞其賢召入侍遷國舅詳穩統  
和二十八年帝謂羣臣曰高麗康肇弑其君誦立誦族  
兄詢而相之大逆也宜發兵問其罪羣臣皆曰可敵烈  
諫曰國家連年征討士卒抗敵况陛下在諒陰年穀不  
登創痍未復島夷小國城壘完固勝不爲武萬一失利  
恐貽後悔不如遣一介之使往問其故彼若伏罪則已  
不然俟服除歲豐舉兵未晚時令已下言雖不行識者  
躡之明年同知左夷離畢事改右夷離畢開泰初率兵  
巡西邊時夷離董部下關撒狻撲里失室勃葛率部民  
遁敵烈追擒之令復業遷國舅詳穩從樞密使耶律世  
良伐高麗還加同政事門下平章事拜上京留守敵烈  
爲人寬厚達政體廷臣皆謂有王佐才漢人行宮都部  
署王繼忠薦其材可爲樞密使帝疑其黨而止爲中京  
留守卒族子忽古有傳弟拔刺  
拔刺字別勒隱多智善騎射開泰間以兄爲右夷離畢  
弟補郎君累遷奚六部禿里太尉太平末大延琳叛拔  
刺將北南院兵往討遇于蒲水南院兵少却至手山復  
與賊遇拔刺乃易兩院旗幟鼓勇力戰破之上聞以手  
詔褒獎賜內廐馬重熙中遷四捷軍詳穩謝事歸鄉里

數歲起爲昭德軍節度使尋改國舅詳穩卒

耶律盆奴字胡獨董惕隱涅魯古之孫景宗時爲烏古部詳穩政尚嚴急民苦之有司以聞詔曰盆奴任方面寄以細故究問恐損威望尋遷馬羣太保統和十六年隱實燕軍之不任事者汰之二十八年駕征高麗盆奴爲元鋒至銅州高麗將康肇分兵爲三以抗我軍一營于州西據三水之會肇居其中一營近州之山一附城而營盆奴率耶律弘古擊破三水營擒肇李玄蘊等軍望風潰會大軍至斬三萬餘級追至開京破敵於西嶺高麗王詢聞邊城不守遁去盆奴入開京焚其王宮廼

撫慰其民人上嘉其功遷北院大王薨

蕭排押字韓隱國舅少父房之後多智略能騎射統和初爲左皮室詳穩討阻卜有功四年破宋將曹彬米信兵于望都凡軍事有疑每預參決尋總永興宮分糶及舍利拽刺二皮室等軍與樞密使耶律斜軫收復山西所陷城邑是冬攻宋隸先鋒圍蒲城率所部先登拔之改南京統軍使尚衛國公主拜駙馬都尉加同政事門下平章事十三年歷北南院宣徽使條上時政得失及賦役法上嘉納焉十五年加政事令遷東京留守二十二年復攻宋將渤海軍下德清軍後蕭撻凜卒專任南

面事宋和議成爲北府宰相聖宗征高麗將兵由北道  
進至開京西嶺破敵軍斬數千級高麗王詢懼奔平州  
排押入開京大掠而還帝嘉之封蘭陵郡王開泰二年  
以宰相知西南面招討使五年進王東平排押爲政寬  
裕而善斷諸部畏愛民以殷富時議多之七年再伐高  
麗至開京敵奔潰縱兵俘掠而還渡茶陀二河敵夾射  
排押委甲仗走坐是免官太平三年復王鞠薨弟恒德  
恒德字遜寧有膽略而善謀統和元年尚越國公主拜  
駙馬都尉遷南面林牙從宣徽使耶律阿沒里征高麗  
還改北面林牙會宋將曹彬米信侵燕耶律休哥與恒  
德議軍事多見信用爲東京留守六年上攻宋圍沙堆  
恒德獨當一面城上矢石如雨恒德意氣自若督將士  
奪其裨城陷中流矢太后親臨視賜藥攻長城口復先  
登太后益多其功時高麗未附恒德受詔率兵拔其邊  
城王始懼上表請降十二年八月賜啓聖竭力功臣從  
都部署和朔奴討兀惹未戰兀惹請降恒德利其俘獲  
不許兀惹死戰城不能拔和朔奴議欲引退恒德曰以  
彼倔疆吾奉詔來討無功而還諸部謂我何若深入多  
獲猶勝徒返和朔奴不得已進擊東南諸部至高麗北  
鄙比還道遠糧絕士馬死傷甚衆坐是削功臣號十四

年爲行軍都部署伐蒲盧毛朶部還公主疾太后遣宮人賢釋侍之恒德私馬公主恚而薨太后怒賜死後追封蘭陵郡王子匹敵

匹敵字蘓隱一名昌裔生未月父母俱死育于禁掖既長尚秦晉王公主拜駙馬都尉爲殿前副點檢統和八年改北面林牙太平四年遷殿前都點檢出爲國舅詳穩九年渤海大延琳叛劫掠隣部與南京留守蕭孝穆往討孝穆欲全城降乃築重城圍之數月城中人陰來納款遂擒延琳東京平以功封蘭陵郡王十一年聖宗不豫先是欽哀與仁德皇后有隙以匹敵嘗爲后所愛

忌之時護衛馮家奴上變誣弟泥卜與匹敵謀逆以皇后攝政徐議當立者公主竊聞其謀謂匹敵曰爾將無罪被戮與其死何若奔女直國以全其生匹敵曰朝廷詎肯以飛語害忠良寧死弗適他國及欽哀攝政殺之耶律資忠字沃衍小字札刺系出仲父房兄國留善屬文聖宗重之時妻弟之妻阿古與奴通將奔女直國國留追及奴殺之阿古自經阿古母有寵于太后事聞太后怒將殺之帝度不能救遣人訣別問以後事國留謝曰陛下憫臣無辜恩漏九泉死且不朽旣死人多寃之在獄著兔賦寤寐歌爲世所稱資忠博學工辭章年四

十未仕聖宗知其賢召補宿衛數問以古今治亂資忠對無隱開泰中授中丞眷遇日隆初高麗內屬取女直六部地以賜至是貢獻不時至詔資忠往問故高麗無歸地意由是權貴數短於上出爲上京副留守四年再使高麗留弗遣資忠每懷君親輒有著述號西亭集帝與羣臣宴時一記憶曰資忠亦有此樂乎九年高麗上表謝罪始送資忠還帝郊迎同載以歸命大臣宴勞留禁中數日謂曰朕將屈卿爲樞密何如資忠對曰臣不才不敢奉詔乃以爲林牙知惕隱事初資忠在高麗也弟昭爲著帳郎君坐罪沒家產至是乃復橫帳且還舊產詔以外戚女妻之是時樞密使蕭合卓少師蕭把哥有寵資忠不肯俛附詆之帝怒奪官數歲出知來遠城事歷保定昭德二軍節度使聖宗崩表請會葬旣至伏梓宮大慟曰臣幸遇聖明橫被構譖不獲盡犬馬報氣絕而蘓興宗命醫治疾久之言國舅侍中無憂國心陛下不當復用唐景福舊號於是用事者惡之遣歸鎮卒

弟昭有傳

耶律瑤質字拔里董積慶宮人父侯古室肅部節度使瑤質篤學廉介有經世志統和十年累遷至積慶宮使聖宗嘗諭瑤質曰聞卿正直是以進用國有利害爾言

宜無所隱由是所陳多見嘉納上征高麗破康肇軍于  
銅州瑤質之力爲多王詢乞降羣臣議皆謂宜納瑤質  
曰王詢始一戰而敗遽求納款此詐耳納之恐墮其姦  
計待其勢窮力屈納之未晚已而詢果遁清野無所獲  
其衆阻險而壘攻之不下瑤質以計降之擢拜四蕃部  
詳穩時招討使耶律頗的爲總管理質耻居其下上表  
曰臣先朝舊臣今旣垂老乞還新命覬得常侍左右帝  
曰朕不使汝久處是任且命無隸招討得專奏事到部  
戢暴懷善政績顯著卒于官

軍事任爲拽刺詳穩尋徙南京統軍使十三年狗地南  
鄙克敵於四岳橋斬首百餘級攻宋以戰功遷東京留  
守封楚國公後伐高麗副先鋒耶律盆奴擒康肇于銅  
州三十年西北部叛從南府宰相耶律奴瓜討之及典  
禁軍號令整肅諸部多降尋遷侍中卒

高正不知何郡人統和初舉進士第累遷樞密直學士  
上將伐高麗遣正先往諭意及還遷右僕射時高麗王  
詢表請入覲上許之遣正率騎兵千人逐之館于路爲  
高麗將卓思正所圍正以勢不可敵與麾下壯士突圍  
出士卒死傷者衆上悔輕發釋其罪明年遷工部侍郎

爲北院樞密副使開泰五年卒

耶律的琿字耶寧仲父房之後習兵事爲左皮室詳穩  
統和二十八年伐高麗的琿率本部軍與益奴等擒康  
肇李玄蘊于銅州帝壯之曰以卿英才爲國戮力真吾  
家千里駒也乃賜御馬及細鎧明年爲北院大王出爲  
烏古敵烈部都詳穩年七十二卒

大康又渤海人開泰間累官南府宰相出知黃龍府善  
綏撫東部懷服榆里底乃部長伯陰與榆烈比來附送  
于朝且言蒲盧毛朶界多渤海人乞取之詔從其請康  
又領兵至大石河馳準城掠數百戶以歸未幾卒

論曰高句驪弑其君誦而立誦遼興問罪之師宜其尊  
食壺漿以迎除舍以待而迺乘險旅拒俾智者竭其謀  
勇者窮其力雖得其要領而顯顯獨居一海之中自若  
也豈服人者以德而不以力歟况乎殘毀其宮室係累  
其民人所謂以燕伐燕也歟嗚呼朱崖之棄捐之力  
也敵烈之諫有焉

八十八終

遼史卷八十九

列傳第十九

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣泌灌等  
奉

勅重校刊

耶律庶成 庶箴

蒲魯

楊哲

耶律韓留

楊浩

耶律和尚

耶律庶成字喜隱小字陳六季父房之後父吳九檢校  
太師庶成幼好學書過目不忘善遼漢文字於詩尤工



重熙初補牌印郎君累遷樞密直學士與蕭韓家奴各  
進四時逸樂賦帝嗟賞初契丹醫人鮮知切脉審藥上  
命庶成譯方脉書行之自是人皆通習雖諸部族亦知  
醫事時入禁中叅決疑議偕林牙蕭韓家奴等撰實錄  
及禮書與樞密副使耶律德脩定法令上詔庶成曰方  
今法令輕重不倫法令者爲政所先人命所繫不可不  
慎卿其審度輕重從宜修定庶成參酌古今刊正訛謬  
成書以進帝覽而善之庶成方進用爲妻胡篤所誣以  
罪奪官紬爲庶耶律使吐蕃凡十二年清寧間始歸帝  
知其誣詔復本族仍遷所奪官卒庶成嘗謂林牙夢善  
卜者胡呂古卜曰官止林牙因妻得罪及置於理法當  
離婚胡篤適有娠至期不產而死剖視之其子以手抱  
心識者謂誣夫之報有詩文行于世弟庶箴

庶箴字陳甫善屬文重熙中爲本族將軍咸雍元年同  
知東京留守事俄徙烏衍突厥部節度使九年知薊州  
事明年遷都林牙上表乞廣本國姓氏曰我朝創業以  
來法制修明惟姓氏止分爲二耶律與蕭而已始太祖  
制契丹大字取諸部鄉里之名續作一篇著于卷末臣  
請推廣之使諸部各立姓氏庶男女婚媾有合典禮帝  
以舊制不可遽釐不聽大康二年出耶律乙辛爲中京

留守庶箴與耶律孟簡表賀頃之乙辛復爲樞密使專  
權恣虐庶箴私見乙辛泣曰前抗表非庶箴之願也乙  
辛信其言乃得自安聞者鄙之八年致仕卒子蒲魯  
蒲魯字乃展幼聰悟好學甫七歲能誦契丹大字習漢  
文末十年博通經籍重熙中舉進士第在文以國制無  
契丹試進士之條聞于上以庶箴擅令子就科目鞭之  
二百尋命蒲魯爲牌印郎君應詔賦詩立成以進帝嘉  
賞顧左右曰文才如此必不能武事蒲魯奏曰臣自家  
義方兼習騎射在流輩中亦可周旋帝未之信會從獵  
三矢中三兔帝奇之轉通進是時父庶箴嘗寄戒諭詩

蒲魯答以賦衆稱其典雅寵遇漸隆清寧初卒

楊哲字昌時安次人幼通五經大義聖宗聞其穎悟詔  
試詩授秘書省校書郎太平十一年擢進士乙科爲著  
作佐郎重熙十二年累遷樞密都承旨權度支使登對  
稱旨進樞密副使歷長寧軍節度使山西路轉運使知  
興中府清寧初入知南院樞密使與姚景行同總朝政  
請行柴冊禮封趙國公以足疾復知興中府咸雍初徙  
封齊召賜同德功臣尚書左僕射兼中書令拜樞密使  
改封晉給宰相樞密使兩廳廉從封趙王屢請歸政益  
賜保節功臣致仕大康五年例改遼西郡王薨

耶律韓留字速寧仲父隋國王之後有明識篤行義舉  
上嚴重工爲詩統和間召攝御院通進開泰三年稍遷  
烏古敵烈部都監俄知詳穩事敵烈部叛將宮分軍從  
樞密使耶律世良討平之加千牛衛大將軍重熙元年  
累遷至同知上京留守改奚六部禿里太尉性不苟合  
爲樞密使蕭解里所忌上欲召用韓留解里言目病不  
能視議遂寢四年召爲北面林牙帝曰朕早欲用卿聞  
有疾故待之至今韓留對曰臣昔有目疾才數月耳然  
亦不至于昏第臣駑拙不能事權貴是以不獲早覩天  
顏非陛下聖察則愚臣豈有今日耶詔進述懷詩上嘉  
歎方將大用卒

楊佶字正叔南京人幼穎悟異常讀書自能成句識者  
奇之弱冠聲名籍甚統和二十四年舉進士第一歷校  
書郎大理正開泰六年轉儀曹郎典掌書命加諫議大  
夫出知易州治尚清簡徵發期會必信入爲大理少卿  
累遷翰林學士文章號得體八年燕地饑疫民多流殍  
以佶同知南京留守事發倉廩振乏絕貧民鬻子者計  
備而出之宋遣梅詢賀千齡節詔佶迎送多唱酬詢每  
見稱賞復爲翰林學士重熙元年陞翰林學士承旨丁  
母憂起復工部尚書歷中順軍節度使朔武等州觀察

處置使天德軍節度使加特進檢校太師同中書門下  
平章事復拜參知政事兼知南院樞密使十五年出爲  
武定軍節度使境內方旱苗稼將槁視事之夕雨澤霑  
足百姓歌曰何以蘇我上天降雨誰其撫我楊公爲主  
灤陽水失故道歲爲民害乃以已俸創長橋人不病涉  
及被召郡民攀轅泣送上御清涼殿宴勞之卽日除吏  
部尚書兼門下侍郎同中書門下平章事上曰卿今日  
何減呂望之遇文王倍對曰呂望比臣遭際有十年之  
晚上悅其居相位以進賢爲已任事總大綱責成百司  
人人樂爲之用三請致政許之月給錢粟僦隸四時遣  
使存問卒有登瀛集行于世

耶律和尚字特抹系出季父房善滑稽重熙初補祗候  
郎君時帝篤于親親凡三父之後皆序父兄行第於和  
尚尤狎愛然每侍宴飲雖談諧未嘗有一言之過由是  
上益重之歷積慶永興官使累遷至同知南院宣徽使  
事南面林牙十六年出爲懷化軍節度使俄召爲御史  
大夫二十三年因大冊加天平軍節度使檢校太師徙  
中京路案問使卒和尚雅有美行數以財恤親友人皆  
愛重然嗜酒不事事以故不獲柄用或以爲言答曰吾  
非不知顧人生如風燈石火不飲將何爲晚年沈酒尤

甚人稱爲酒仙云

論曰庶成定法令治民者不容高下其手庶箴雖嘗表請廣姓氏以秩典禮其隨勢俯仰則有愧於其子蒲魯矣楊替爲上寵遇迭封王爵而功業不少槩見然得愛民治國之要其楊佶哉

遼史卷八十九

遼史卷九十

列傳第二十

元開府儀同三司上柱國刑中書右丞相兼修國史都總裁脫脫修

皇明奉訓大夫右春坊右諭德

院侍講署國子監事臣沈滙等

奉

初重校刊

蕭阿剌

耶律義先

信先

蕭陶隗

蕭塔刺葛

耶律敵祿

蕭阿剌字阿里懶北院樞密使孝穆之子也幼養宮中與宗尤愛之重熙六年爲弘義宮使累遷同知北院樞

密使加同中書門下平章事出爲東宮留守二十一年拜西北路招討使封西北郡王尋尚秦晉國王公主拜駙馬都尉清寧元年遺詔拜北府宰相兼南院樞密使進王韓明年改北院樞密使徙王陳與蕭革同掌國政革諂諛不法阿刺爭之不得告歸上由此惡之除東京留守會行瑟瑟禮入朝陳時政得失革以事中傷帝怒縊殺之皇太后營救不及大慟曰阿刺何罪而遽見殺帝乃優加賻贈葬乾陵之赤山阿刺性忠果曉世務有經濟才議者以謂阿刺若在無重元乙辛之亂

耶律義先于越仁先之弟也美風姿舉止嚴重重熙初補祗候郎君班詳穩十三年車駕西征爲十二行紮都監戰功最改南院宣徽使時蕭革同知樞密院事席寵擅權義先疾之因侍讌言于帝曰革狡佞喜亂一朝大用必誤國家言甚激切不納它日侍宴上命羣臣博負者罰一巨觥義先當與革對憮然曰臣縱不能進賢退不肖安能與國賊博哉帝止之曰卿醉矣義先厲聲訴不已上大怒賴皇后救得解翌日上謂革曰義先無禮當黜之革對曰義先天性忠直今以酒失而出誰敢言人之過上謂革忠直益加信任義先鬱鬱不自得然議事未嘗少沮又於上前博義先祝曰向言人過冒犯天

威今日一擲可表愚款俄得堂印上愕然十六年爲殿  
前都點檢討蒲奴里多所招降獲其酋長陶得里以歸  
手詔褒獎以功改南京統軍使封武昌郡王奏請統軍  
司錢營息以贍貧民未甚軍器完整民得休息二十一  
年拜惕隱進王富春薨年四十二義先常戒其族人曰  
國中三父房皆帝之昆弟不孝不義尤不可爲其接下  
無貴賤賢否皆與均禮其妻晉國長公主之女每遇中  
表親非禮服不見故內外多化之清寧間追贈許王弟  
信先

信先興宗以其父瑰引爲刺血友幼養于宮善騎射重  
熙十四年爲左護衛太保同知殿前點檢司事十八年  
兼右祗候郎君班詳穩上問所欲信先曰先臣瑰引與  
陛下分如同氣然不及王封儻使蒙恩地下臣願畢矣  
上曰此朕遺忘之過追封燕王是年從蕭惠伐夏敗於  
河南例被責清寧初爲南面林牙卒

蕭陶隗字烏古鄰宰相轄特六世孫剛直有威重咸雍  
初任馬群太保素知群牧名存實亡悉閱舊籍除其羸  
病錄其實數牧人畏服陶隗上書曰群牧以少爲多以  
無爲有上下相蒙積弊成風不若括見真數著爲定籍  
公私兩濟從之畜產歲以蕃息大康中累遷契丹行宮

都部署上嘗謂群臣曰北樞密院軍國重任久闕其人  
耶律阿思蕭幹特刺二人孰愈群臣各譽所長陶隗獨  
默然上問卿何不言陶隗曰訛特刺懦而敗事阿思有  
才而貪將爲禍基不得已而用敗事猶勝基禍上曰陶  
隗雖魏徵不能過但恨吾不及太宗爾然竟以阿思爲  
樞密使由是阿思銜之九年西園不寧阿思奏曰邊隅  
事大可擇重臣鎮撫上曰陶隗何如阿思曰誠如聖旨  
遂拜西南面招討使阿思陰與蕭阿忽帶誣奏賊掠漠  
南牧馬及居民畜產陶隗不急追捕罪當死詔免官久  
之起爲塌毋城節度使未行疽發背卒陶隗負氣怒則  
須髯輒張每有大議必毅然決之雖上有難色未嘗遽  
已見權貴無少屈竟爲阿思所陷時人惜之二子曰圖  
木轄式阿思死始獲進用

蕭塔刺葛字陶晒六院部人素剛直太祖時坐叔祖臺  
晒謀殺于越釋魯沒入弘義宮世宗卽位以舅氏故出  
其藉補國舅別部敞史或言泰寧王察割有無君心塔  
刺葛曰彼縱忍行不義人孰肯從他日侍宴酒酣塔刺  
葛捉察割耳強飲之曰上固知汝傲狠然以國屬曲加  
矜憫使汝在左右且度汝才何能爲若長惡不悛徒自  
取赤族之禍察割不能答強笑曰何戲之虐也天祿未



塔刺葛爲北府宰相及察割作亂塔刺葛醉詈曰吾悔  
不殺此逆賊尋爲察割所害

耶律敵祿字陽隱孟父楚國王之後性質直多膂力察  
割作亂敵祿聞之入見壽安王慷慨言曰願得精兵數  
百破賊黨王嘉其忠穆宗卽位爲北院宣徽使上以飛  
狐道狹詔敵祿廣之明年將兵援河東至太原與漢王  
會于高平擊周軍敗之仍降其衆忻代二州叛將兵討  
之會耶律撻烈至敗周師於忻口師還卒

論曰忠臣惟知有國而不知有身故惡惡不避其患阿  
刺以諂諛不法折蕭華陶隗以用必基禍言阿思塔刺  
葛以忍行不義徒自取赤族之罪責察割其心可謂忠  
矣言一出而禍輒隨之吁邪正旣不辨國焉得無亂哉

遼史卷九十

萬曆二十四年刊

遼史卷九十

五

五

遼史卷九十一

列傳第二十一

元開府儀同三司上柱國前中書右丞相兼修國史都總裁脫脫修  
皇明奉訓大 訥德兼翰林院侍講署國子監臣沈瀛等

奉

勅重校刊

耶律韓八


耶律唐古

蕭朮哲 藥師奴

耶律玦

耶律僕里篤

耶律韓八字嘲隱個儻有犬志北院詳穩古之五世孫  
太平中游京師寓行宮側惟囊衣匹馬而已帝微服出



獵見而問之曰汝爲何人韓八初不識漫應曰我北院  
部人韓八來覓官耳帝與語知有長才陰識之會北院  
奏南京疑獄久不決帝召韓八馳驛審錄舉朝皆驚韓  
八量情處理人無冤者上嘉之籍羣牧馬闕其二同事  
者考尋不已韓八畧不加詰卽先馳奏帝益信任景福  
元年爲左夷離畢徙北面林牙眷遇優異重熙六年改  
北院大王政務寬仁復爲左夷離畢十二年再爲北院  
大王入朝帝從容謂曰卿守邊任重當實府庫振貧乏  
以報朕旣受詔愈竭忠謹知無不言便益爲多卒年五  
十五上聞惜死之日篋無舊蓄施無新衣遣使弔祭  
給葬具韓八平居不屑細務喜愠不形嘗失所乘馬家  
僮以同色者代之數月不覺

耶律唐古字敵隱于越屋質之庶子廉謹善屬文統和  
二十四年述屋質安民治盜之法以進補小將軍遷西  
南面巡檢歷豪州刺史唐古部詳穩嚴立科條禁姦民  
鬻馬於宋夏界因陳弭私販安邊境之要太后嘉之詔  
邊境遵行著爲令朝議欲廣西南封域黑山之西綿亘  
數千里唐古言戍壘太遠卒有警急赴援不及非良策  
也從之西蕃來侵詔議守禦計命唐古勸督耕稼以給  
西軍田于臚胸河側是歲大熟明年移屯鎮州凡十四

稔積粟數十萬斛斗米數錢重熙間改隗衍党項部節  
度使先是築可敦城以鎮西域諸部縱民畜牧反招寇  
掠重熙四年上疏曰自建可敦城已來西蕃數爲邊患  
每煩遠戍歲月旣久國力耗竭不若復守故疆省罷戍  
役不報是年致仕乞勒其父屋質功于石帝命耶律庶  
成製文勒石上京崇孝寺卒年七十八

蕭木哲字石魯隱孝讓弟高九之子以戚屬加監門衛  
上將軍重熙十三年將衛兵討李元昊有功遷興聖宮  
使蒲奴里部長陶得里叛木哲爲統軍都監從都統耶  
律義先擊之擒陶得里木哲與義先不協誣義先罪免

官稍遷西南面招討都監坐事下獄以太后言杖而釋  
之清寧初爲國舅詳穩西北路招討使私取官粟三百  
斛及代留畜產令主者鬻之以償後族弟胡覲到部發  
其事帝怒決以大杖免官尋起爲昭德軍節度使徵爲  
北院宣徽使九年上以木哲先爲招討威行諸部復爲  
西北路招討使訓士卒增器械省追呼嚴號令人不敢  
犯邊境晏然十年入朝封柳城郡王咸雍二年拜北府  
宰相爲北院樞密使耶律乙辛所忌誣木哲與護衛蕭  
忽古等謀害乙辛詔獄無狀罷相出鎮順義軍卒追王  
晉宋梁三國姪藥師奴

藥師奴幼穎悟謹禮法補祇候郎君大康中爲興聖宮使累遷同知殿前點檢司事上嘉其宿衛嚴肅遷右夷离畢夏王李乾順爲宋所攻求解帝命藥師奴持節使宋請罷兵通好宋從之拜南面林牙改漢人行宮副部署乾統初出爲安宋軍節度使卒

耶律玠字吾展遙輦鮮質可汗之後重熙初召脩國史補符寶郎累遷知北院副部署事入見太后后顧左右曰先皇謂玠必爲偉人果然除樞密副使出爲西南面招討都監歷同簽南京留守事南面林牙皇弟秦國王爲遼興軍節度使以玠同知使事多所匡正十年復爲樞密副使咸雍初兼北院副部署及秦國王爲西京留守請玠爲佐從之歲中獄空者三召爲孟父房敞隱玠不喜貨殖帝知其貧賜宮戶十嘗謂宰相曰契丹忠正無如玠者漢人則劉伸而已然孰察之玠優於伸先是西北諸部久不能平上遣玠問狀執弛慢者痛繩之以酒疾卒

耶律僕里篤字燕隱六院林牙突呂不也四世孫開泰間爲本班郎君有捕盜功樞密使蕭朴薦之遷率府率太平中同知南院宣徽事累遷彰聖軍節度使十六年知興中府以獄空聞十八年伐夏攝西南面招討使十

九年夏人侵金肅軍敗之斬首萬餘級加右武衛上將軍時近邊羣牧數被寇掠遷倒塌嶺都監以治之桴鼓不鳴二十年知金肅軍事宰相趙惟節總領邊城橋道芻粟請二帝命僕里篤副之以稱職聞清寧初歷長寧匡義二軍節度使致仕咸雍間卒子阿固質終倒塌嶺都監

論曰韓八因帝微行才始見售及任以事落落知大體不負上之知矣唐古木哲經畧西北邊勸農積粟訓練士卒敵人不敢犯玦以忠直見稱於上僕里篤以幹敏爲宰相佐在鎮俱以獄空聞之數人者豈特甲冑之士亦李牧程不識之亞歟

遼史卷九十一終

遼史卷九十二 列傳第二十二

遼史卷九十二

列傳第二十二

元開府儀同三司上柱國前中書右丞相兼修國史都總裁脫脫修  
皇明 奏訓大夫右春坊右 誥德兼翰林院侍講 石國子監事 臣沈淮等  
奉

勅重校刊

蕭奪刺

蕭曾達

耶律候晒

耶律古昱

耶律獨擲

蕭韓家

蕭烏野

蕭奪刺字接擲遙輦注可汗宮人祖涅魯古北院樞密

萬曆三十四年刊

遼史卷九十二

列傳

一

副使父撒抹字胡獨董重熙初補祇候郎君累遷北面  
林牙十九年從耶律宜新蕭蒲奴伐夏至蕭惠敗績之  
地獲偵候者知人煙聚落多國人陷沒而不能還者盡  
俘以歸拜大父敞穩知山北道邊境事清寧初歷西南  
面西北路招討使加同中書門下平章事卒奪刺體貌  
豐偉騎射絕人由祇候郎君陞漢人行宮副部署後爲  
烏古敵烈統軍使克敵有功加龍虎衛上將軍授西北  
路招討使因陳北邊利害請以本路諸部與倒塌嶺統  
軍司連兵屯戍再表不總改東北路統軍使乾統元年  
以父練邊事復爲西北路招討使北阻卜耶覲刮率鄰  
部來侵奪刺途擊追奔數十里二年乘耶覲刮無備以  
輕騎襲之獲馬萬五千足牛羊稱是先是有詔方面無  
事招討副統軍都監內一員入覲是時同僚皆闕奪刺  
以軍事付幕吏而朝坐是免官改西京留守復爲東北  
路統軍卒于官

蕭會達字彈隱統和初爲南院承旨開泰六年出爲烏  
古部節度使七年敵烈部叛討平之徙烏古敵烈部都  
監遣敵烈騎卒取北阻卜名馬以獻賜詔褒獎重熙初  
改烏古敵烈部都詳穩討諸蕃有功會達深練邊事能  
以悅使人有所俘獲悉散麾下由是大得衆心歷西南



面招討使党項叛入西夏普達討之中流矢歿于陣帝聞惜之賻贈加厚

耶律侯哂字禿寧北院夷离董蒲古只之後祖查只北院大王父忽古黃皮室詳穩候哂初爲西南巡邊官以廉潔稱累遷南京統軍使尋爲北院大王重熙十一年党項部人多叛入西夏侯哂受詔巡西邊沿河要地多建城堡以鎮之徙東京留守十三年與知府蕭歐里斯討蒲盧毛朶部有功加兼侍中致仕卒

耶律古昱字磨魯董北院林牙突呂不四世孫有膂力工馳射開泰間爲烏古敵烈部都監會部人叛從樞密使耶律世良討平之以功詔鎮撫西北部教以種樹畜牧不數年民多富實中京盜起命古昱爲巡邏使悉擒之上親征渤海將黃皮室軍有破敵功累遷御史中丞尋授開遠軍節度使徙鎮歸德二十一年改天成軍節度使卒于官年七十贈同中書門下平章事二子宜新兀沒宜新重熙間從蕭惠討西夏惠敗績宜新一軍獨全拜北院大王兀沒大康三年爲漢人行宮副部署乙辛誣害太子詞連兀沒帝釋之是秋乙辛復奏與蕭楊九私議宮壺事被害乾統間贈同中書門下平章事耶律獨攬字胡獨董太師古昱之子重熙初爲左護衛

將禁兵從伐夏有功授十二行紘司徒再舉伐夏獨擲  
括山西諸郡馬還遷拽刺詳穩西南未平命獨擲同知  
金肅軍事夏人來侵擊敗之進涅刺與隗部節度使清  
寧元年召爲皇太后左護衛太保四年改寧遠軍節度  
使東路饑奏振之歷五國烏古部遼興軍三鎮節度使  
四捷軍詳穩大康元年卒追贈同中書門下平章事子  
阿思有傳

蕭韓家國舅之族性端簡謹愿動循禮法清寧中爲護  
衛大保大康二年遷知北院樞密副使三年經畫西南  
邊天池舊塹立堡砦正疆界刻石而還爲漢人行宮都  
部署是年秋獵墮馬卒

蕭烏野字草隱其先出興聖宮分觀察使塔里直之孫  
也性孝悌尚禮法雅爲鄉黨所稱重熙中補護衛興宗  
見其勤恪遷護衛太保佐耶律仁先平重元亂以功加  
團練使時敵烈部數爲鄰部侵擾民多困弊命烏野爲  
敵烈部節度使恤困窮省徭役不數月部人以安尋以  
母老歸養于家母亡尤極哀毀服闋歷官興聖延慶二  
宮使卒

論曰烏古敵烈大部也奪刺爲統軍克敵有功普達居  
詳穩悅以使人西北重鎮也侯哂巡邊以廉稱古昱鎮

撫而民富獨擯駐金肅而夏人不敢東獵噫部人內附  
方面以寧雖朝廷處置得宜而諸將之力抑亦何可少  
哉

遼史卷九十二終

遼史卷九十三

列傳第二十三

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奉

勅重校刊

蕭惠慈氏奴

蕭迂魯鐸盧幹

蕭圖玉

耶律鐸軫

蕭惠字伯仁小字脫古思淳欽皇后弟阿古只五世孫  
初以中宮親爲國舅詳穩從伯父排押征高麗至奴古  
達北嶺高麗阻險以拒惠力戰破之及攻開京以軍律

通史卷九十三 五傳  
整肅聞授契丹行宮都部署開泰二年改南京統軍使  
未幾爲右夷离畢加同中書門下平章事朝議以遼東  
重地非勲戚不能鎮撫乃命惠知東京留守事改西北  
路招討使封魏國公太平六年討回鶻阿薩蘭部徵兵  
諸路獨阻卜酋長直刺後期立斬以徇進至甘州攻圍  
三日不克而還時直刺之子聚兵來襲阻卜酋長烏八  
密以告惠未之信會西阻卜叛襲三克軍都監涅魯古  
突舉部節度使詣里阿不呂等將兵三千來救遇敵于  
可敦城西南詣理阿不呂戰歿士卒潰散惠倉卒列陣  
敵出不意攻我營衆請乘時奮擊惠以我軍疲敝未可  
用弗聽烏八請以夜斫營惠又不許阻卜歸惠乃設伏  
兵擊之前鋒始交敵敗走惠爲招討累年屢遭侵掠士  
馬疲困七年左遷南京侍衛親軍馬步軍都指揮使尋  
遷南京統軍使興宗卽位知興中府歷順義軍節度使  
東京留守西南面招討使加開府儀同三司檢校太師  
兼侍中封鄭王賜推誠協謀竭節功臣重熙六年復爲  
契丹行宮都部署加守太師徙王趙拜南院樞密使更  
王齊是時帝欲一天下謀取三關集羣臣議惠曰兩國  
疆弱聖慮所悉宋人西征有年師老民疲陛下親率六  
軍臨之其勝必矣蕭孝穆曰我先朝與宋和好無罪伐

之其曲在我况勝敗未可逆料願陛下熟察帝從惠言  
迺遣使索宋十城會諸軍于燕惠與太弟帥師壓宋境  
宋人重失十城增歲幣請和惠以首事功進王韓十二  
年兼北府宰相同知元帥府事又爲北樞密使十三年  
夏國李元昊誘山南党項諸部帝親征元昊懼請降惠  
曰元昊忘奕世恩萌姦計車駕親臨不盡歸所掠天誘  
其衷使彼來迎天與不圖後悔何及帝從之詰旦進軍  
夏人列拒馬于河西蔽盾以立惠擊敗之元昊走惠麾  
先鋒及右翼邀之夏人千餘潰圍出我師逆擊大風忽  
起飛沙眯目軍亂夏人乘之蹂踐而死者不可勝計詔  
班師十七年尚弟姊秦晉國長公主拜駙馬都尉明年  
帝復征夏國惠自河南進戰艦糧船綿亘數百里旣入  
敵境偵候不還鎧甲載于車軍士不得乘馬諸將咸請  
備不虞惠曰諒祚必自迎車駕何暇及我無故設備徒  
自弊耳數日我軍未營候者報夏師至惠方詰妄言罪  
諒祚軍從阪而下惠與麾下不及甲而走追者射惠幾  
不免軍士死傷尤衆師還以惠子慈氏奴歿于陣詔釋  
其罪十九年請老詔賜肩輿入朝策杖上殿辭章再上  
乃許之封魏國王詔冬夏赴行在參決疑議旣歸遣賜  
湯藥及他賜賚不絕每生日輒賜詩以示尊寵清寧二

年薨年七十四遺命家人薄葬訃聞輟朝三日惠性寬厚自奉儉薄興宗使惠恣取珍物惠曰臣以戚屬據要地祿足養廉奴婢千餘不爲闕乏陛下猶有所賜貧於臣者何以待之帝以爲然故爲將雖數敗衄不之罪也弟虛列武定軍節度使二子慈氏奴兀古匿兀古匿終北府宰相慈氏奴字寧隱太平初以戚屬補祗候郎君上愛其勤慎陞闡撒狄加右監門衛上將軍西邊有警授西北路招討都監領保大軍節度使政濟恩威諸部悅附入爲殿前副點檢歷烏古敵烈部詳穩征李諒祚爲統軍都監與西北路招討使敵魯古率蕃部諸軍由北路趨涼州獲諒祚親屬夏人扼險以拒慈氏奴中流矢卒年五十一贈中書門下平章事

蕭迂魯字胡突董五院部人父約質歷官節度使迂魯重熙間爲牌印郎君清寧九年國家旣平重元之亂其黨郭九等亡詔迂魯追捕獲之遷護衛太保咸雍元年使宋議邊事稱旨知殿前副點檢事五年阻卜叛爲行軍都監擊敗之俘獲甚衆初軍出止給五月糧過期糧之士卒往往叛歸迂魯坐失計免官降戍西北部未行會北部兵起迂魯將烏古敵烈兵擊敗之每戰以身先繇是釋前罪命總知烏古敵烈部九年敵烈叛都監耶

律獨迭以兵少不戰屯臚胸河敵烈合邊人掠居民迂  
魯率精騎四百力戰敗之盡獲其輜重繼聞酋長合木  
三千餘騎掠附近部落縱兵躡其後連戰二日斬數千  
級盡得被掠人畜而還值敵烈黨五百餘騎劫捕鷹戶  
逆擊走之俘斬甚衆自是敵烈勢沮時敵烈方爲邊患  
而阻卜相繼寇掠邊人以故疲弊朝廷以地遠不能時  
益援軍而使疆圉帖然者皆迂魯力也帝嘉其功拜左  
皮室詳穩會宋求天池之地召迂魯兼統兩皮室軍屯  
太牢占山以備之太康初阻卜叛遷西北招討都監從  
都統耶律趙三征討有功改南京統軍都監黃皮室詳  
穩未幾遷東北路統軍都監卒弟鐸盧幹

鐸盧幹字撒板幼驚悟異常兒三歲失母哭盡哀見者  
傷之及長魁偉沉毅好學善屬文有才幹年三十始仕  
爲朝野推重給事北院知聖旨事大康二年乙辛再入  
樞府鐸盧幹素與蕭巖壽善誣以罪謫戍西北部坐皇  
太子事特恩減死仍錮終身在戍十餘年太子事稍直  
始得歸鄉里屏居謝人事一日臨流聞雉鳴三復孔子  
詩哉語作古詩三章見志當時名士稱其高情雅韻不  
減古人壽隆六年卒年六十一乾統初贈彰義軍節度

使

蕭圖玉字兀衍北府宰相海黎之子統和初皇太后稱制以戚屬入侍尋爲烏古部都監討速母縷等部有功遷烏古部節度使十九年總領西北路軍事後以本路兵伐甘州降其酋長牙懶旣而牙懶復叛命討之克肅州盡遷其民于土隗口故城師還詔尚金鄉公主拜駙馬都尉加同政事令門下平章事上言曰阻卜今已服化宜各分部治以節度使上從之自後節度使徃徃非材部民怨而思叛開泰元年七月石烈太師阿里底殺其節度使西奔窩魯朶城蓋古所謂龍庭單于城也已而阻卜復叛圍圖玉于可敦城勢甚張圖玉使諸軍齊射却之屯于窩魯朶城明年北院樞密使耶律化哥引兵來救圖玉遣人誘諸部皆降帝以圖玉始雖失計後得人心釋之仍領諸部請益軍詔讓之曰叛者旣服兵安用益且前日之役死傷甚衆若從汝謀邊事何時而息遂止會公主坐殺家婢降封郡主圖玉罷使相尋起爲烏古敵烈部詳穩以老代還卒子雙古南京統軍使孫訛篤幹尚三韓郡王合魯之女骨浴公主終烏古敵烈部統軍使以善戰名于世

耶律鐸軫字敵輦積慶宮人仕統和間性疎簡不顧小節人物以是短之後侵宋分總羸師以從及戰取緋帛



被介胄以自標顯馳突出入敵陣格殺甚衆太后望見  
喜召謂之曰卿戮力如此何患不濟厚賞之由是多以  
軍事屬任俄授東北詳穩開泰二年進討阻卜克之重  
熙間歷東路統軍使天德軍節度使十七年城西邊命  
鐸軫相地及造戰艦因成樓船百三十艘上置兵下立  
馬規制堅壯稱旨及西征詔鐸軫率兵由別道進會于  
河濱敵兵阻河而陣帝御戰艦絕河擊之大捷而歸親  
賜卮酒仍問所欲鐸軫對曰臣幸被聖恩得効駑力萬  
死不能報國又將何求帝愈重之手書鐸軫衣裾曰勤  
國忠君處世無雙卒于官年七十子低烈歷觀察節度

使

論曰劫遼之謀復三關也蕭惠贊伐宋之舉而宋人增  
幣請和狃於一勝移師西夏而勇智俱廢敗潰隨之豈  
非貪小利迷遠圖而然况所得不償所亡利果安在哉  
同時諸將撫綏邊圉若汪魯忠勤不伐鐸軫高情雅韻  
鐸盧幹雖廉不逮蕭惠而無邀功啓釁之罪亦庶乎君  
子之風矣

遼史卷九十三之終

遼史卷九十四

列傳第二十四

元開府儀同三司上柱國刑中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奉

勅重校刊

耶律化哥

耶律幹臘

耶律速撒

蕭阿魯帶

耶律那也

耶律何魯掃古

耶律世良

耶律化哥字弘隱孟父楚國王之後善騎射乾亨初為

北院林牙統和四年南侵宋化哥擒謀者知敵由海路  
來襲卽先據平州要地事平拜上京留守遷北院大王  
十六年復侵宋爲先鋒破敵于遂城以功遷南院大王  
尋改北院樞密使開泰元年伐阻卜阻卜棄輜重遁走  
俘獲甚多帝嘉之封函王後邊吏奏自化哥還闕糧乏  
馬弱勢不可守上復遣化哥經略西境化哥與邊將深  
入聞蕃部逆命居翼只水化哥徐以兵進敵望風奔潰  
獲羊馬及輜重路由白拔烈遇阿薩蘭回鶻掠之都監  
裏里繼至調化哥曰君誤矣此部實効順者化哥悉還  
所俘諸蕃由此不附上使案之削王爵以侍中遙領大  
同軍節度使卒

耶律幹臘字斯寧奚迭刺部人趨捷有力善騎射保寧  
初補護衛車駕獵頡山適豪猪伏叢莽帝射中猪突出  
御者托滿捨轡而避廐人鶴骨翼之幹臘復射而斃帝  
嘉賞及獵赤山適奔鹿奮角突前路隘不容避垂犯蹕  
幹臘以身當之鹿觸而顛帝謂曰朕因獵兩瀕于危賴  
卿以免始見爾心遷護衛太保從樞密使耶律斜軫破  
宋將楊繼業軍于山西統和十三年秋爲行軍都監從  
都部署奚王和朔奴伐兀惹烏昭度數月至其城昭度  
請降和朔奴利其俘掠令四面急攻昭度率衆死守隨

方捍禦依埤堦虛構戰棚誘我軍登陴俄撤枝柱登者盡覆和朔奴知不能下欲退蕭恒德謂師久無功何以藉口若深入大涼猶勝空返幹臘曰深入恐所得不償所損恒德不從略地東南循高麗北鄙還道遠糧絕人馬多死詔奪諸將官惟幹臘以前議得免尋加同政事門下平章事爲東京留守開泰中卒

耶律速撒字阿敏性忠直簡毅練武事應曆初爲侍從累遷突呂不部節度使歷霸濟祥順聖五州都總管俄爲敦睦宮太師保寧三年改九部都詳穩四年伐党項屢立戰功手詔勞之統和初皇太后稱制西邊甫定速撒務安集諸蕃利害輒具以聞太后益信任之凡臨戎與士卒同甘苦所獲均賜將校賞順討逆威信大振在邊二十年卒

蕭阿魯帶字乙辛隱烏隗部人父女古仕至紇詳穩阿魯帶少習騎射曉兵法請寧間始仕累遷本部司徒改烏占敵烈統軍都監大安七年遷山北副部署九年達理得拔思毋二部來侵率兵擊却之達理得復劫牛羊去阿魯帶引兵追及盡獲所掠斬渠帥數人是冬達理得等以三百餘人梗邊復戰却之斬首二百餘級加金吾衛上將軍封蘭陵縣公壽隆元年第功加同中書門

下平章事進爵郡公改西北路招討使乾統三年坐留  
宋俘當遣還者爲奴免官後被徵以老疾致仕卒

耶律那也字移斯輦夷离董蒲古只之後父幹常爲北  
尅從伐夏戰歿季父趙三始爲宿直官累遷至北面林  
牙咸雍四年拜北院大王改西南面招討使大康中西  
北諸部擾邊議欲往討帝以爲非趙三不可遂拜西北  
路招討使兼行軍都統平之以功復爲北院大王那也  
敦厚才敏上以其父幹死王事九歲加諸衛小將軍爲  
題里司徒尋召爲宿直官太康三年爲遙輦尅大安九  
年爲倒撻嶺節度使明年冬以北阻卜長磨古斯叛與

招討都監耶律胡呂率精騎二千往討破之那也薦胡  
呂爲漢人行宮副部署壽隆元年復討達理拔思等有  
功賜詔褒美改烏古敵烈部統軍使邊境以寧部民乞  
留詔許再任乾統六年拜中京留守改北院大王薨那  
也爲人廉介長于理民每有鬪訟親覈曲直不尚威嚴  
常曰凡治人本欲分別是非何事迫脅以立名故所至  
以惠化稱

耶律何魯掃古字烏古鄰孟父房之後重熙末補祗候  
郎君清寧初加安州團練使太康中歷懷德軍節度使  
奚六部禿里大尉詔與樞密官措畫東北邊事改左護

衛太保侍上言多率易察無他腸以故上優貸之八年  
知西北路招討使事時邊部耶都剌等來侵何魯掃古  
誘北阻卜酋豪磨古斯攻之俘獲甚衆以功加左僕射  
復討耶覲剌等誤擊磨古斯北阻卜由是叛命遣都監  
張九討之不克二室韋與六院部特滿羣牧宮分等軍  
俱陷于敵何魯掃古不以實聞坐是削官決以大杖壽  
隆間累遷惕隱兼侍中賜保節功臣道宗崩與宰相耶  
律儼總山陵事乾統中致仕卒

耶律世良小字幹六院部人才敏給練達國朝典故及  
世譜上書與族弟敵烈爭嫡庶帝始識之時北院樞密  
使韓德讓病帝問孰可代卿德讓曰世良可比院大王  
耶律室魯復問北院之選德讓曰無出世良統和末為  
北院大王開泰初因大冊禮加檢校太尉同政事門下  
平章事時邊部拒命詔北院樞密使耶律化哥將兵以  
世良為都監往禦之明年化哥還將罷兵世良上書曰  
化哥以為無事而還不思師老糧乏敵人已去焉能久  
守若益兵可克也帝即命化哥益兵與世良追之至安  
真河大破而還自是邊境以寧以功王岐拜北院樞密  
使三年命選馬馳于烏古部會敵烈部人夷刺殺其酋  
長稍瓦而叛鄰部皆應攻陷巨毋古城世良率兵壓境

遣人招之降數部各復故地四年伐高麗爲副部署都  
統劉慎行逗遛失期執還京師世良獨進兵明年至北  
都護府破追兵于郭州以暴疾卒  
論曰大之懷小也以德制之也以威德不足懷威不足  
制而欲服人也難矣化哥利俘獲而諸蕃不附何魯掃  
古誤擊磨古斯而阻卜叛命是皆喜於一旦之功而不  
圖後日之患庸何議焉若幹臘之戒深入速撤之務安  
集亦鐵中之錚錚者邪

遼史卷之九十四終

遼史卷九十五

列傳第二十五

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奉

勅重校刊

耶律弘古

耶律馬六

蕭滴冽

耶律適祿

耶律陳家奴

耶律特麼

耶律仙童

蕭素颯

耶律大悲奴

耶律弘古字胡篤堇樞密使化哥之弟統和間累遷順  
義軍節度使入爲北面林牙太平元年加同政事門下  
平章事出爲彰國軍節度使兼山北道兵馬都部署徙  
武定軍節度使拜惕隱六年討阻卜有功聖宗嘗刺臂  
血與弘古盟爲友禮遇尤異拜南府宰相改上京留守  
重熙六年遷南院大王御製誥辭以寵之十三年加于  
越帝憫其勞復授武定軍節度使卒計聞上哭曰惜哉  
善人喪至親臨奠焉

耶律馬六字揚隱孟父楚國王之後性寬和善諧謔親  
朋會遇一坐盡傾恬于榮利與耶律弘古爲刺血友弘  
古爲惕隱薦補宿直官重熙初遷旗鼓拽刺詳穩爲人  
畏慎容物或有面相陵折者恬然若弗聞不臧否世務  
以故上益親狎三年遷崇德宮使爲惕隱御製誥辭以  
褒之拜北院宣徽使寵遇過宰輔帝常以兄呼之改遼  
興軍節度使卒年七十子奴古達終南京宣徽使  
蕭滴列字圖寧遙輦鮮質可汗宮人重熙初遙攝鎮國  
軍節度使六年奉詔使宋傷足而跛不告遂行帝怒及  
還决以大杖降同簽南京留守事遙授靜江軍節度使  
歷群牧都林牙畧遷右夷離畢以才幹見任使會車駕  
西征元昊乞降帝以前後反覆遣滴列往覘誠否因爲



元昊陳述禍福聽命乃還拜北院樞密副使出爲中京留守十九年改西京留守卒

耶律適祿字撒懶清寧初爲本班郎君稍遷宿直官乾統中從伐阻卜有功加奉宸歷護衛大保改弘義宮副使時上京梟賊趙鍾哥跋扈自肆適祿擒之加泰州觀察使爲達魯斡部節度使天慶中知興中府加金吾衛上將軍爲盜所殺

耶律陳家奴字綿辛懿祖弟葛刺之八世孫重熙中補牌印郎君坐直日不至降本班會帝獵陳家奴逐鹿圍內鞭之二百時耶律仁先薦陳家奴健捷比海東清鷗

授御蓋郎君歷鷹坊尚廐四方館副使改徒魯古皮室詳穩會太后生辰進詩獻馴鹿太后嘉獎賜珠二琲雜綵二百段兄撒鉢卒陳家奴聞計不告而去帝怒鞭之清寧初累遷右夷離畢適帝與燕國王射鹿俱中王時年九歲帝悅陳家奴應制進詩帝喜解衣以賜後皇太子廢帝疑陳家奴黨附罷之時西北諸部寇邊以陳家奴爲烏古部節度使行軍都監賜甲一屬馬二疋討諸部擒其酋送于朝偵候者見馬蹤意寇至陳家奴遣報元帥耶律愛奴視之曰此野馬也將出獵賊至愛奴戰歿有司詰案陳家奴不伏詔釋之由是感激每事竭力

後諸部復來侵陳家奴率兵三往皆克邊境遂寧以老  
告歸不從道宗崩爲山陵使致仕年八十卒

耶律特麼季父房之後重熙間爲北剋累遷六部禿里  
太尉大安四年爲倒撻嶺節度使頃之爲禁軍都監是  
冬討磨古斯斬首二千餘級十年復討之旣捷授南院  
宣徽使壽隆元年爲北院大王四年知黃龍府事薨  
耶律仙童仲父房之後重熙初爲宿直官累遷惕隱都  
監以寬厚稱蒲奴里叛仙童爲五國節度使率師討之  
擒其帥陶得里又擊烏隗叛降其衆改彰國軍節度使  
拜北院大王清寧二年知黃龍府事遷侍衛親軍馬步

軍都指揮歷忠順武定二軍節度使致仕封蔣國公咸  
雍初徙封許國卒

蕭素颯字特免五院部人重熙間始仕累遷北院承旨  
彰愍宮使清寧初歷左皮室詳穩右夷离畢咸雍五年  
剖阿里部叛素颯討降之率其酋長來朝帝嘉其功徙  
北院林牙改南院副部署卒子謀魯幹字回璉初補夷  
离畢郎君遷文班太保大康中改南京統軍使爲右夷  
离畢與樞密使耶律阿思論事不合見忌出爲馬群太  
保北部來侵謀魯幹破之以功遷同知烏古敵烈統軍  
仍許便宜行事後以讒毀降領西北路戍軍復爲馬群

遼史卷九十五  
列傳  
四  
太保卒

耶律大悲奴字休堅王子班聶里古之後大康中歷永興延昌宮使右皮室詳穩會阻卜叛奉詔招降之壽隆二年拜殿前都點檢乾統初歷上京留守惕隱復爲都點檢改西南面招討使請老不許天慶中留守上京領北南樞密院點檢中丞諸司等事以彰國軍節度使致仕卒大悲奴舉止馴雅好禮儀爲時人所稱

論曰遼自神冊而降席富疆之勢內修法度外事征伐一時將帥震揚威靈風行電掃討西夏征党項破阻卜平敵烈諸部震懾聞鼙鼓而膽落股弁斯可謂雄武之國矣其戰勝攻取必有奇謀秘計神變莫測者將前史所載未足以發之邪抑天之所授衆莫與爭而能然耶雖然兵者凶器可戢而不可玩爭者末節可遏而不可召此黃石公所謂柔能制剛弱能制彊也又况乎仁者之無敵哉遼之君臣智足守此金人果能乘其敝而躡其後乎是以於耶律弘古輩諸將不能無慨然也

遼史卷九十五終

萬曆三十四年

卷九十五

列傳

四

遼史卷九十六

列傳第二十六

五

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奏

遼史卷九十六 列傳第二十六

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奏

勅重校刊

耶律仁先 捷不也 耶律良

蕭韓家奴 蕭德

蕭惟信 蕭樂音奴

耶律敵烈 姚景行

耶律阿思

萬曆三十四年刊 遼史卷九十六 列傳

耶律仁先字弘鄰小字查刺孟父房之後父瑰引南府  
宰相封燕王仁先魁偉爽秀有智略重熙三年補護衛  
帝與論政才之仁先以不世遇言無所隱授宿直將軍  
累遷殿前副點檢改鶴刺唐古部節度使俄召爲北面  
林牙十一年陞北院樞密副使時宋請增歲幣銀絹以  
償十縣地產仁先與劉六符使宋仍議書貢宋難之仁  
先曰曩者石晉報德本朝割地以獻周人攘而取之是  
非利害灼然可見宋無辭以對乃定議增銀絹十萬兩  
匹仍稱貞旣還同知南京留守事十三年伐夏留仁先  
鎮邊未幾召爲契丹行宮都部署奏復王子班郎君及  
諸宮雜役十六年遷北院大王奏今兩院戶口殷庶乞  
免他部助役從之十八年再舉伐夏仁先與皇太弟重  
元爲前鋒蕭惠失利于河南帝猶欲進兵仁先力諫乃  
止後知北院樞密使遷東京留守女直恃險侵掠不止  
仁先乞開山通道以控制之邊民安業封吳王清寧初  
爲南院樞密使以耶律化哥譖出爲南京兵馬副元帥  
守大尉更王隋六年復爲北院大王民歡迎數百里如  
見父兄時北南院樞密官涅魯古蕭胡覩等忌之請以  
仁先爲西北路招討使耶律乙辛奏曰仁先舊臣德冠  
一時不宜補外復拜南院樞密使更王許七月上獵太

子山耶律良奏重元謀逆帝召仁先語之仁先曰此曹  
兇狠臣固疑之矣帝趣仁先捕之仁先出且曰陛下  
宜謹爲之備未及介馬重元犯帷宮帝欲幸北南院仁  
先曰陛下若舍扈從而行賊必躡其後且南北大王心  
未可知仁先子撻不也曰聖意豈可違乎仁先怒擊其  
首帝悟悉委仁先以討賊事乃環車爲營拆行馬作兵  
仗率官屬近侍三十餘騎陣抵柅外及交戰賊衆多降  
湟魯古中矢墮馬擒之重元被傷而退仁先以五院部  
蕭塔刺所居最近亟召之分遣人集諸軍黎明重元率  
奚人二千犯行宮蕭塔刺兵適至仁先料賊勢不能久  
竄其氣沮攻之乃背營而陣乘便奮擊賊衆奔潰追殺  
二十餘里重元與數騎遁去帝執仁先手曰平亂皆卿  
之功也加尚父進封宋王爲北院樞密使親製文以褒  
之詔畫灤河戰圖以旌其功咸雍元年加于越改封遼  
王與耶律乙辛共知北院樞密事乙辛恃寵不法仁先  
抑之由是見忌出爲南京留守改王晉恤孤惻禁姦慝  
宋聞風震服議者以爲自于越休哥之後惟仁先一人  
而已阻卜塔里干叛命仁先爲西北路招討使錫鷹紐  
印及劔上諭曰卿去朝廷遠每俟奏行恐失機會可便  
宜從事仁先嚴斥候扼敵衝懷柔服從庶事整飭塔里

千復來寇仁先逆擊追殺八十餘里大軍繼至又敗之  
別部把里斯禿沒等來救見其屢挫不敢戰而降北邊  
遂安八年卒年六十遺命家人薄葬弟義先信先俱有  
傳于撻不也

撻不也字胡獨董清寧二年補祗候郎軍累遷永興宮  
使以平重元之亂遙授忠正軍節度使賜定亂功臣同  
知殿前點檢司事歷高陽臨海二軍節度使左皮室詳  
穩大康六年授西北路招討使率諸部酋長入朝加兼  
侍中自蕭敵祿爲詔討之後朝廷務姑息多擇柔愿者  
用之諸部漸至跋扈撻不也含容尤甚邊防蓋廢尋改

西南面招討使阻卜酋長磨古斯來侵西北路招討使  
何魯掃古戰不利詔撻不也代之磨古斯之爲酋長由  
撻不也所薦至是遣人誘致之磨古斯始降撻不也逆  
于鎮州西南沙磧間禁士卒無得妄動敵至裨將耶律  
綰斯徐烈見其勢銳不及戰而走遂被害年五十八贈  
侍中諡曰貞憫撻不也少謹愿後爲族嫠婦所惑出其  
妻終以無子人以此譏之

耶律良字習撚小字蘇著帳郎君之後生於乾州讀書  
醫巫間山學旣博將入南山肄業友人止之曰爾無僕  
御驅馳千里縱聞見過人年亦垂暮今若卽仕已有餘

地良曰窮通命也非爾所知不聽留數年而歸重熙中  
補寢殿小底尋爲燕趙國王近侍以家貧詔乘廐馬遷  
修起居注會獵秋山良進秋游賦上嘉之清寧中上幸  
鴨子河作捕魚賦由是寵遇稍隆遷知制誥兼知部署  
司事奏請編御製詩文目曰清寧集上命良詩爲慶會  
集親製其序頃之爲敦睦宮使兼權知皇太后宮諸局  
事良聞重元與子涅魯古謀亂以帝篤於親愛不敢遽  
奏密言於皇太后太后託疾召帝白其事帝謂良曰汝  
欲間我骨肉耶良奏曰臣若妄言甘伏斧鑕陛下不早  
備恐墮賊計如召涅魯古不來可卜其事帝從其言使  
者及門涅魯古意欲害之羈於帳下使者以佩刀斷帶  
而出馳至行宮以狀聞帝始信亂平以功遷漢人行宮  
都部署咸雍初同知南院樞密使事爲惕隱出知中京  
留守事未幾卒帝嗟悼遣重臣賻祭給葬具追封遼西  
郡王謚曰忠成

蕭韓家奴字括寧奚長渤海魯恩之後性孝友太平中補  
祗候郎君累遷敦睦宮使伐夏爲左翼都監遷北面林  
牙俄爲南院副部署賜玉帶改奚六部大王治有聲清  
寧初封韓國公歷南京統軍使北院宣徽使封蘭陵郡  
王九月上獵太子山聞重元亂馳詣行在帝倉卒欲避



于北南大王院與耶律仁先執轡固諫乃止明日重元復誘奚獵夫來韓家奴獨出諭之曰汝曹去順効逆徒取族滅何若悔過轉禍爲福獵夫投伏首服以功遷殿前都點檢封荆王賜資忠保義奉國竭貞平亂功臣咸雍二年遷西南面招討使大康初徙王吳賜白海東青鶻皇太子爲乙辛誣構幽于上京韓家奴上書力言其冤不報四年復爲西南面招討使例削一字王爵改王蕭陵薨子楊九終右祇候郎君班詳穩贈同中書門下平章事蕭德字特末隱楮特部人性和易篤學好禮法太平中領牌印直宿累遷北院樞密副使敷奏詳明多稱旨

詔與林牙耶律庶成修律令改契丹行宮都部署賜官戶十有五清寧元年遷同知北院樞密使封魯國公上以德爲先朝眷遇拜南府宰相五年轉南京統軍使九年復爲南府宰相重元之亂推鋒力戰斬涅魯古首以獻論功封漢王咸雍初以告老歸優詔不許義之加尚父致仕卒年七十二

蕭惟信字耶寧楮特部人五世祖霞賴南府宰相曾祖烏古中書令祖阿古只知平州父高八多智數博覽古今開泰初爲北院承旨稍遷右夷離畢以幹敏稱拜南府宰相累遷倒塌嶺節度使知興中府復爲右夷離畢

陵青誘衆作亂事覺高八按之止誅首惡餘金釋之歸  
奏稱旨惟信資沉毅篤志于學能辨論重熙初始仕累  
遷左中丞十五年徙燕趙國王傳帝諭之曰燕趙左右  
多面諛不聞忠言浸以成性汝當以道規誨使知君父  
之義有不可處王邸者以名聞惟信輔導以禮十七年  
遷北院樞密副使坐事免官尋復職兼北面林牙清寧  
九年重元作亂犯灤河行宮惟信從耶律仁先破之賜  
竭忠定亂功臣歷南京留守左右夷離畢復爲北院樞  
密副使大康中以老乞骸骨不聽樞密使耶律乙辛譖  
廢太子中外知其冤無敢言者惟信數廷爭不得復告

老加守司徒卒

蕭樂音奴字婆丹奚六部敞穩突呂不六世孫父拔刺  
三歲居父母喪毀瘠過甚養于家奴奚列阿不重熙初  
興宗獵奚山過拔刺所居奚列阿不言于近臣拔刺得  
見上年甫十歲氣象如成人帝悅之錫賚甚厚旣長有  
遠志不樂仕進隱于奚王嶺之插合谷上以其名家又  
有時譽就拜舍利軍詳穩樂音奴貌偉言辨通遼漢文  
字善騎射擊鞠所交皆一時名士年四十始爲護衛平  
重元之亂以功遷護衛太保改本部南尅俄爲旗鼓拽  
刺詳穩監障海東青鶻獲白花者十三賜搢桎犀并玉

吐鶻拜五蕃部節度使卒子陽阿有傳  
耶律敵烈字撒懶採訪使吼五世孫寬厚好學工文詞  
重熙末補牌印郎君兼知起居注清寧元年稍遷同知  
永州事禁盜有功改北面林牙承旨九年重元作亂敵  
烈赴援力戰平之遙授臨海軍節度使十年徙武安州  
觀察使咸雍五年累遷長寧宮使檢括戶部司乾州錢  
帛逋負立出納經畫法公私便之大康四年爲南院大  
王秩滿部民請留同知南京留守事有疾上命乘傳赴  
闕遣太醫視之遷上京大安中改塌毋城節度使以疾  
致仕加兼侍中賜一品俸八年卒

姚景行始名景禧祖漢英本周將應曆初來聘用敵國  
禮帝怒留之隸漢人宮分及景行既貴始出籍貫興中  
縣景行博學重熙五年擢進士乙科爲將作監改燕趙  
國王教授不數年至翰林學士樞密副使參知政事性  
敦厚廉直人望歸之道宗卽位多被顧問爲北府宰相  
九年秋告歸道聞重元亂收集行旅得三百餘騎勤王  
比至賊已平帝嘉其忠賜以逆人財產咸雍元年出爲  
武定軍節度使明年驛召拜南院樞密使上從容問治  
道引入內殿出御書及太子書示之賜什器車杖帝有  
意伐宋召景行問曰宋人好生邊事如何對曰自聖宗

皇帝以威德懷遠宋修職貢迄今幾六十年若以細故用兵恐違先帝成約上然其言而止致仕不踰月復舊職丁家艱起復兼中書令上問古今儒士優劣占對稱旨知興中府改朔方軍節度使大康初徙鎮遼興以上京多滯獄命爲留守不數月以獄空聞累乞致政不從復請許之加守太師卒遣使弔祭追封柳城郡王諡文憲壽隆五年詔爲立祠

耶律阿思字撒班清寧初補祗候郎君以善射掌獵事進渤海近侍詳穩重元之亂與護衛蘇射殺涅魯古賜號靖亂功臣徙契丹行宮都部署大安初爲北院大王封漆水郡王十一年爲北院樞密使監修國史道宗崩受顧命加于越錄乙辛黨人罪重者當籍其家阿思受賂多所寬貫蕭合魯嘗言當修邊備阿思力沮其事或譏其以金賈國後以風疾失音致仕加尚父封趙王薨年八十追封齊國王

論曰灤河之變重元擁兵行幄微仁先等道宗其危乎當其止幸北南院召塔刺兵以靖大難功宜居首良以反謀白太后韓家奴以逆順降奚人德與阿思殺涅魯古皆有討賊之力焉仁先齊名休哥勲德兼備此其一節歟

遼史卷九十六終

遼史卷九十七

列傳第二十七

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈淮等  
奉

勅重校刊

耶律幹特刺

孩里

竇景庸

耶律引吉

楊績

趙徽

王觀

耶律喜孫

耶律幹特刺字乙辛隱許國王寅底石六世孫少不喜

遼史卷九十七

官祿年四十一始補本班郎君時樞密使耶律乙辛擅  
權讒害忠良幹特刺恐禍及深自抑畏大康中爲宿直  
官歷左右護衛大保安元年升燕王傳徙左夷离畢  
四年改北院樞密副使帝賜詩褒之遷知北院樞密使  
事賜翼聖佐義功臣北阻卜酋長磨古斯叛幹特刺率  
兵進討會天大雪敗磨古斯四別部斬首千餘級拜西  
北路招討使封漆水郡王加賜宣力守正功臣尋拜南  
府宰相復討闡古胡里扒部破之召爲契丹行宮都部  
署先是北南府有訟各州府得就按之比歲非奉樞密  
檄不得鞫問以故訟者稽留幹特刺奏請如舊從之五  
年復爲西北路招討使討耶覲剖部俘斬甚衆獲馬馳  
牛羊各數萬明年擒磨古斯加守太保賜奉國匡化功  
臣乾統初乞致仕不許止罷招討南院樞密使封混同  
郡王遷北院樞密使加守太師賜推誠贊治功臣致仕  
薨諡曰敬肅

孩里字胡輦回鶻人其先在大祖時來貢願留因任用  
之孩里重熙間歷近侍長清寧九年討重元之亂有功  
加金吾衛上將軍賜平亂功臣累遷殿前都點檢以宿  
衛嚴肅稱大康初加守太子太保二年加同中書門下  
平章事三年改同知南院宣徽使事會耶律乙辛出守

中京孩里入賀及議復召陳其不可後乙辛再入樞府  
出孩里爲廣利軍節度使及皇太子被誣孩里當連坐  
有詔勿問大安初歷品達魯虢部節度使壽隆五年有  
疾自言吾數已盡却醫藥卒年七十七孩里素信浮圖  
清寧初從上獵墮馬憤而復蘇言始見二人引至一城  
宮室宏敞有衣絳袍人坐殿上左右列侍導孩里升階  
持牘者示之曰本取大腹骨欲誤執汝牘上書官至使  
相壽七十七須臾還擠之大瘞而寤道宗聞之命書其  
事後皆驗

竇景庸中京人中書令振之子聰敏好學清寧中第進  
士授秘書省校書郎累遷少府少監咸雍六年授樞密  
直學士尋知漢人行宮副部署事大安初遷南院樞密  
副使監修國史知樞密院事賜同德功臣封陳國公有  
疾表請致仕不從加太子太保授武定軍節度使審決  
冤滯輕重得宜以獄空聞七年拜中京留守九年薨諡  
曰肅憲子瑜三司副使

耶律引吉字阿括品部人父雙古鎮西邊二十餘年治  
尚嚴肅不殖貨利時多稱之引吉寅畏好義以廕補官  
累遷東京副留守北樞密院侍御時蕭革蕭圖古辭等  
以佞見任鬻爵納賄引吉以直道處其間無所阿唯改

客省使時朝廷遣使括三京隱戶不得以引吉代之得  
數千餘戶時昭懷太子知北南院事選引吉爲輔導樞  
密使乙辛將傾太子惡引吉在側奏出之爲群牧林牙  
大康元年乙辛請賜牧地引吉奏曰今牧地褊陋畜不  
蕃息豈可分賜臣下帝乃止乙辛由是益嫉之除懷德  
軍節度使徙漠北猾水馬群太保卒

楊績良鄉人太平十一年進士及第累遷南院樞密副  
使與杜防韓知白等擅給進士堂帖降長寧軍節度使  
徙知涿州清寧初拜參知政事兼同知樞密院事爲南  
府宰相九年聞重元亂與姚景行勤王上嘉之十年知

興中府咸雍初入知樞密院事二年乞致仕不許拜南  
院樞密使帝以績舊臣特詔燕見論古今治亂人臣邪  
正帝曰方今群臣忠直耶律玦劉伸而已然伸不及玦  
之剛介績拜賀曰何代無賢世亂則獨善其身至聖則  
兼濟天下陛下銖分邪正升黜分明天下幸甚累表告  
歸不許封趙王大康中以例改王遼西致仕加守太保  
薨子貴忠知興中府

趙徽南京人重熙五年擢甲科累遷大理正清寧二年  
銅州人妄毀三教徽按鞫之以狀聞稱旨歷煩劇有能  
名累遷翰林學士承旨咸雍初爲度支使三年拜參知



政事出爲武定軍節度使及代軍民請留後同知樞密院事兼南府宰相門下侍郎平章事致仕卒追贈中書令諡文憲

王觀南京人博學有才辯重熙七年中進士乙科興宗崩充夏國報哀使還除給事中咸雍初遷翰林學士五年兼乾文閣學士七年改南院樞密副使賜國姓參知政事兼知南院樞密事坐矯制修私第削爵爲民卒耶律喜孫字盈隱永興宮分人興宗在青宮嘗居左右輔導聖宗大漸喜孫與馮家奴告仁德皇后同宰相蕭浞卜等謀逆事及欽哀爲皇太后稱制喜孫尤見寵任

重熙中其子涅哥爲近侍坐事伏誅帝以喜孫有翼戴功且悼其子罪死欲世其官喜孫無所出之部因見馬印文有品部號使隸其部拜南府宰相尋出爲東北路詳穩卒

論曰孩里引吉之爲臣也當乙辛擅權蕭革貪黷之日雖與同官而能以正自處不少阿唯其過人遠矣傳曰歲寒知松栢之後凋二子有焉若幹特刺之戰功竇景庸之讞獄楊績之忠言亦賢矣夫

遼史卷九十七終

遼史卷九十八

列傳第二十八

元開府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署國子監事臣沈澹筆  
奉

勅重校刊

蕭兀納

耶律儼

劉仲

耶律胡呂

蕭兀納一名撻不也字特免六院部人其先嘗為西南  
面拽刺兀納魁偉簡重善騎射清寧初兄圖獨以事入  
見帝問族人可用者圖獨以兀納對補祗候郎君遷近

侍敝史護衛太保大康初爲北院宣徽使時乙辛已害  
太子因言宋魏國王和魯幹之子淳可爲儲嗣羣臣莫  
敢言唯兀納及夷离畢蕭陶隗諫曰舍嫡不立是以國  
與人也帝猶豫不決五年帝出獵乙辛請留皇孫帝欲  
從之兀納奏曰竊聞車駕出遊將留皇孫苟保護非人  
恐有他變果留臣請侍左右帝乃悟命皇孫從行由此  
始疑乙辛頃之同知南院樞密使事出乙辛淳等帝嘉  
其忠封蘭陵郡王人謂近於古社稷臣授殿前都點檢  
上謂王師儒耶律固等曰兀納忠純雖狄仁傑輔唐屋  
費立穆宗無以過也卿等宜達燕王知之自是令兀納

輔導燕王益見優寵太安初詔尚越國公主兀納固辭  
改南院樞密使奏請掾史宜以歲月遷敘從之壽隆元  
年拜北府宰相初天祚在潛邸兀納數以直言忤旨及  
嗣位出爲遼興軍節度使守太傅以佛殿小底王華誣  
兀納借內府犀角詔鞫之兀納奏曰臣在先朝詔許日  
取帑錢十萬爲私費臣未嘗妄取一錢肯借犀角乎天  
祚愈怒奪太傅官降寧邊州刺史尋改臨海軍節度使  
兀納上書曰自蕭海里亡入女直彼有輕朝廷心宜益  
兵以備不虞不報天慶元年知黃龍府事改東北路統  
軍使復上書曰臣治與女直接境觀其所爲其志非小

宜先其未發舉兵圖之章數上皆不聽及金兵來侵戰于寧江州其孫移敵蹇死之兀納退走入城留官屬守禦自以三百騎渡混同江而西城遂陷後與蕭敵里拒金兵于長灤以軍敗免官五年天祚親征兀納殿復敗績後數日乃與百官入見授上京留守六年耶律章奴叛來攻京城兀納發府庫以資士卒諭以逆順完城池以死拒戰章奴無所得而去以功授副元帥尋爲契丹都宮使天祚以兀納先朝重臣有定策勲每延問以政兀納對甚切上雖優容終不能用以疾卒年七十耶律儼字若思析津人本姓李氏父仲禧重熙中始仕

清寧初同知南院宣徽使事四年城鴨子混同二水間拜北院宣徽使咸雍初坐誤奏事出爲榆州刺史俄詔復舊職遷漢人行宮都部署六年賜國姓封韓國公改南院樞密使時樞臣乙辛等誣陷皇太子詔仲禧偕乙辛鞫之蔓引無辜未嘗雪正乙辛薦仲禧可任拜廣德軍節度使復爲南院樞密使卒謚欽惠儼儀觀秀整好學有詩名登咸雍進士第守著作佐郎補中書省令史以勤敏稱大康初歷都部署判官將作少監後兩府奏事論羣臣優劣唯稱儼才俊改少府少監知大理正賜紫六年遷大理少卿奏讞詳平明年陞大理卿丁父憂

奪服同僉部署司事大安初爲景州刺史繩胥徒禁豪猾撫老恤貧未數月善政流播郡人刻石頌德二年改御史中丞詔案上京滯獄多所平反同知宣徽院事提點大理寺六年冬改山西路都轉運使刮剔垢弊奏定課額益州縣俸給事皆施行壽隆初授樞密直學士以毋憂去官尋召復舊職宋攻夏李乾順遣使求和解帝命儼如宋平之拜參知政事六年駕幸鴛鴦灤召至內殿訪以政事帝晚年倦勤用人不能自擇令各擲骰子以采勝者官之儼嘗得勝采上曰上相之徵也遷知樞密院事賜經邦佐運功臣封越國公修皇朝實錄七十

卷帝大漸儼與北院樞密使阿思同受顧命乾統三年徙封秦國六年封涿水郡王天慶中以疾命乘小車入朝疾甚遣太醫視之薨贈尚父謚曰忠懿儼素廉潔一芥不取於人經籍一覽成誦又善伺人主意妻邢氏有美色嘗出入禁中儼教之曰慎勿失上意由是權寵益固三子處貞太常少卿處兼同知中京留守事處能少府少監

劉伸字濟時宛平人少穎悟長以辭翰聞重熙五年登進士第歷彰武軍節度使掌書記大理正因奏獄上適與近臣語不顧伸進曰臣聞自古帝王必重民命願陛

下省臣之奏上大驚異擢樞密都承旨權中京副留守  
詔徙富民以實春泰二州伸以爲不可奏罷之遷大理  
少卿人以不寃陞大理卿改西京副留守以父憂終制  
爲三司副使加諫議大夫提點大理寺以伸明法而恕  
案寃獄全活者衆徙南京副留守俄改崇義軍節度使  
政務簡靜民用不擾致烏鵲同巢之異優詔褒之改戶  
部使歲入羨餘錢三十萬緡拜南院樞密副使道宗嘗  
謂大臣曰今之忠直耶律玠劉伸而已宰相楊績賀其  
得人拜參知政事上諭之曰卿勿憚宰相時北院樞密  
使乙辛勢焰方熾伸奏曰臣於乙辛尚不畏何宰相之  
畏乙辛衝之相與排詆出爲保靜軍節度使上終欲大  
用加守太子太保遷上京留守乙辛以事徙鎮雄武復  
以崇義軍節度使致仕適燕薊民饑伸與致仕趙徽韓  
造日濟以糜粥所活不勝筭大安二年卒上震悼賻贈  
加等

耶律胡呂字蘇撒弘義宮分人其先欲穩佐太祖有功  
爲迭烈部夷離董父楊五左監門衛大將軍胡呂性謙  
謹於人無適莫重熙末補寢殿小底以善職屢更華要  
遷千牛衛大將軍大安中北阻卜酋磨魯斯叛爲招討  
都監與耶律那也率精騎二千討平之以功爲漢人行

宮副部署兼知太和宮事致仕加同中書門下平章事  
卒

論曰兀納當道宗昏惑之會擁佑皇孫使乙辛亥計不  
獲復逞而遼祚以續比之屋質立穆宗非溢美也儼以  
俊才蒞政所至有能譽纂述遼史具一代治亂亦云勤  
矣但其固寵不能以禮正家惜哉劉伸三為大理民無  
冤抑一登戶部上下兼裕至與耶律玠並稱忠直不亦  
宜乎

遼史卷九十八終

遼史卷九十九

列傳第二十九

元開府儀同三司上柱國前中書右丞相兼修國史都總裁脫脫修  
皇明奉訓大夫右奉直學士諭德兼翰林院侍講學士監事臣沈淮等  
奉

勅重校刊

蕭巖壽

耶律撒刺

蕭速撒

耶律撻不也

蕭撻不也

蕭忽古

耶律石柳

蕭巖壽乙室部人性剛直尚氣仕重熙末道宗即位皇

太后屢稱其賢由是進用上出獵較巖壽典其事未嘗  
高下于心帝益重之歷文班太保同知樞密院事成雍  
四年從耶律仁先伐阻卜破之有詔留屯亡歸者衆由  
是鑄兩官十年討敵烈部有功爲其部節度使大康元  
年同知南院宣徽使事遷北面林牙密奏乙辛以皇太  
子知國政心不自安與張孝傑數相過從恐有陰謀動  
搖太子上悟出乙辛爲上京留守會乙辛生日上遣近  
臣耶律白斯本賜物爲壽乙辛因私屬白上臣見姦人  
在朝陛下孤危身雖在外竊用寒心白斯本還以聞上  
遣人賜乙辛車諭曰無慮弗用行將召矣由是反疑巖

壽出爲順義軍節度使乙辛復入爲樞密使流巖壽于  
烏隗路終身拘作巖壽雖竄逐恒以社稷爲憂特人爲  
之語曰以狼牧羊何能久長三年乙辛誣巖壽與謀廢  
立事執還殺之年四十九乾統間贈同中書門下平章  
事繪像宜福殿巖壽廉直面折廷諍多與乙辛忤故及  
於難

耶律撒刺字董隱南院大王磨魯古之孫性忠直沉厚  
清寧初累遷西南面招討使以治稱咸雍九年改北院  
大王未幾爲契丹行宮都部署大康二年耶律乙辛爲  
中京留守詔百官廷議欲復召之羣臣無敢正言撒刺



獨奏曰蕭巖壽言乙辛有罪不可爲樞臣故陛下出之  
今復召恐天下生疑進諫者三不納左右爲之震悚乙  
辛復爲樞密使見撒刺讓曰與君無憾何獨異議撒刺  
曰此社稷計何憾之有乙辛誣撒刺與速撒同謀廢立  
詔按無迹出爲始平軍節度使及蕭訛都幹誣首竟遣  
使殺之乾統間追封漆水郡王繪像宜福殿仍追贈二

子官爵

蕭速撒字禿魯董突呂不部人性沉毅重熙間累遷右  
護衛太保蒲奴里叛從耶律義先往討執首亂陶得里  
以歸清寧中歷北面林牙彰國軍節度使入爲北院樞

密副使咸雍十年經畧西南邊撤宋堡障戍以皮室軍  
上嘉之大康二年知北院樞密使耶律乙辛權寵方盛  
附麗者多至通顯速撒未嘗造門乙辛銜之誣構速撒  
首謀廢立按之無驗出爲上京留守乙辛復令蕭訛都  
幹以前事誣告上怒不復加訊遣使殺之時方盛暑尸  
諸原野容色不變烏鵲不敢近乾統間追封蘭陵郡王  
繪像宜福殿

耶律撻不也字撒班繫出季父房父高家仕至林牙重  
熙間破夏人于金肅軍有功優加賞賚撻不也清寧中  
補牌印郎君累遷永興宮使九年平重元之亂以功知

點檢司事賜平亂功臣爲懷德軍節度使咸雍五年遷  
遙輦剋大康三年授北院宣徽使耶律乙辛謀害太子  
撻不也知其姦欲殺乙辛及蕭特里得蕭十三等乙辛  
知之令其黨誣構撻不也與廢立事殺之乾統間追封  
涿水郡王繪像宜福殿

蕭撻不也字幹里端國舅郡王高九之孫性剛直咸雍  
中補祗候郎君大康元年爲彰愍宮使尚趙國公主拜  
駙馬都尉三年改同知漢人行宮都部署與北院宣徽  
使耶律撻不也善乙辛嫉之令人誣告謀廢立事不勝  
榜掠誣伏上引問昏瞶不能自陳遂見殺乾統間追封

蘭陵郡王繪像宜福殿

蕭忽古字阿斯憐性忠直趨撻有力甫冠補禁軍咸雍  
初從招討使耶律趙三討番部之違命者及請降來介  
有能躍駝峯而上者以環捷相詫趙三問左右誰能此  
忽古被重鎧而出手不及峯一躍而上使者大駭趙三  
以女妻之帝聞召爲護衛時北院樞密使耶律乙辛以  
狡佞得幸肆行兇暴忽古伏于橋下伺其過欲殺之俄  
以暴雨壞橋不果後又欲殺于獵所爲親友所阻大康  
三年復欲殺乙辛及蕭得里特等乙辛知而械繫之考  
劾不服流于邊及太子廢徙于上京召忽古至殺之乾

通史卷九十九 齊傳 四  
統初追贈龍虎衛上將軍

耶律石柳字酬宛六院部人祖獨擲南院大王父安十  
統軍副使石柳性剛直有經世志始為牌印郎君大康  
初為夷離畢郎君時樞密使耶律乙辛誣殺皇后謀廢  
太子斥忠賢進姦黨石柳惡其所為乙辛覺之太子既  
廢以石柳附太子流鎮州天祚即位召為御史中丞時  
方治乙辛黨有司不以為意石柳上書曰臣前為姦臣  
所陷斥竄邊郡幸蒙召用不敢隱默恩賞明則賢者勸  
刑罰當則姦人消二者既舉天下不勞而治臣見耶律  
乙辛身出寒微位居樞要竊權肆惡不勝名狀蔽先帝

之明誣陷順聖構害忠讜敗國罔上自古所無賴廟社  
之休陛下獲纂成業積年之寃一旦洗雪政陛下英斷  
克成孝道之秋如蕭得里特實乙辛之黨耶律合魯亦  
不為早辨賴陛下之明遂正其事臣見陛下多疑故有  
司顧望不切推問乙辛在先帝朝權寵無比先帝若以  
順考為實則乙辛為功臣陛下豈得立耶先帝黜逐嬖  
后詔陛下在左右是亦悔前非也陛下詎可忘父讐不  
報寬逆黨不誅今靈骨未獲而求之不切傳曰聖人之  
德無加于孝昔唐德宗因亂失母思慕悲傷孝道益著  
周公誅飛廉惡來天下大悅今逆黨未除大寃不報上

無以慰順考之靈下無以釋天下之憤怨氣上結水旱  
爲沴臣願陛下下明詔求順考之瘞所盡收逆黨以正  
邦憲快四方忠義之心昭國家賞罰之用然後致治之  
道可得而舉矣謹別錄順聖升遐及乙辛等事昧死以  
聞書奏不報聞者莫不歎惋乾統中遙授靜江軍節度  
使卒子馬哥同中書門下平章事  
論曰易言履霜堅冰至謹始也使道宗能從巖壽撒刺  
之諫后何得而誣太子何得而廢哉速撒撻不也以忠  
言見殺國欲無亂得乎石柳之書亦幸出於乙辛旣敗  
之後獲行其說有國家者可不知人哉

遼史卷九十九終

遼史卷一百

列傳第三十

元開府儀同三司上柱國前中書右丞相兼修國史都總裁脫脫修  
皇明憲訓大夫右春坊右諭德兼翰林院侍講署國監事臣沈灌等

奉

勅重校刊

耶律棠古

蕭得里底

蕭酬幹

耶律章奴

耶律木者

耶律棠古字蒲速宛六院郎君葛刺之後太康中補本  
班郎君累遷至大將軍性坦率好別白黑人有不善必

盡言無隱時號強棠古在朝數論宰相得失由是久不  
得調後出爲西北戍長乾統三年蕭得里底爲西北路  
招討使以後族慢侮僚吏棠古不屈乃罷之棠古訟之  
朝不省天慶初烏古敵烈叛召拜烏古部節度使至部  
諭降之遂出私財及發富民積以振其困乏部民大悅  
加鎮國上將軍會蕭得里底以都統率兵與金人戰敗  
績棠古請以軍法論且曰臣雖老願爲國破敵不納保  
大元年乞致仕明年天祚出奔棠古謁於倒塌嶺爲上  
流涕上慰止之復拜烏古部節度使及至部敵烈以五  
千人來攻棠古率家奴擊破之加太子太傅年七十二  
卒

蕭得里底字紉鄰晉王孝先之孫父撒鉢歷官使相得  
里底短而僂外謹內倨大康中補祗候郎君稍遷興聖  
宮副使兼同知中丞司事太安中燕王妃生子得里底  
以妃叔故歷寧遠軍節度使長寧宮使壽隆二年監討  
達里得拔思母二部多俘而還改同知南京留守事乾  
統元年爲北面林牙同知北院樞密事受詔與北院樞  
密使耶律阿思治乙辛餘黨阿思納賄多出其罪得里  
底不能制亦附會之四年知北院樞密事夏王李乾順  
爲宋所攻遣使請和解詔得里底與南院樞密使牛溫

舒使宋平之宋既許得里底受書之日乃日始奉命取  
要約歸不見書辭豈敢徒還遂對宋主發函而讀既還  
朝議爲是天慶三年加守司徒封蘭陵郡王女直初起  
廷臣多欲乘其未備舉兵徃討得里底獨阻之以至敗  
屺天祚以得里底不合人望出爲西南面招討使八年  
召爲北院樞密使寵任彌篤是時諸路大亂飛章告急  
者絡繹而至得里底不卽上聞有功者亦無甄別由是  
將校怨怒人無鬪志保大二年金兵至嶺東會耶律撒  
八習騎撒跋等謀立晉王敖盧幹事泄上召得里底議  
曰及者必以此兒爲名若不除去何以護安得里底唯

唯竟無一言申理王既死人心益離金兵踰嶺天祚率  
衛兵西遁元妃蕭氏得里底之姪謂得里底曰爾任國  
政致君至此何以生爲得里底但謝罪不能對明日天  
祚怒逐得里底與其子麼撒得里底既去爲耶律高山  
奴執送金兵得里底伺守者怠脫身亡歸復爲耶律九  
斤所得送之耶律淳時淳已僭號得里底自知不免詭  
曰吾不能事僭竊之君不食數日卒子麼撒爲金兵所  
殺

蕭酬幹字訛里本國舅少父房之後祖阿刺終採訪使  
父別里刺以后父封趙王酬幹貌雄偉性和易年十四

尚越國公主拜駙馬都尉爲祗候郎君班詳穩年十八封蘭陵郡王時帝欲立皇孫爲嗣恐無以解天下疑出酬幹爲國舅詳穩降皇后爲惠妃遷于乾州初酬幹母入朝擅取驛馬至是覺奪其封號復與妹魯姐爲巫蠱伏誅詔酬幹與公主離婚籍興聖宮流烏古敵烈部天慶中以妹復尊爲太皇太妃召酬幹爲南女直詳穩遷征東副統軍時廣州渤海作亂乃與駙馬都尉蕭韓家奴襲其不備平之復敗敵將侯槩于川州是歲東京叛遇敵來擊師潰獨酬幹率麾下數人力戰歿于陣追贈龍虎衛上將軍

耶律章奴字特末衍季父房之後父查刺養高不仕章奴明敏善談論大安中補牌印郎君乾統元年累遷右中丞兼領牌印宿直事六年以直宿不謹降知內客省事天慶四年授東北路統軍副使五年改同知咸州路兵馬事及天祚親征女直蕭胡篤爲先鋒都統章奴爲都監大軍渡鴨子河章奴與魏國王淳妻兄蕭敵里及其甥蕭延留等謀立淳誘將卒三百餘人亡歸旣而天祚爲女直所敗章奴乃遣敵里延留以廢立事馳報淳淳猶豫未決會行宮使者乙信持天祚御札至備言章奴叛命淳對使者號哭卽斬敵里延留首以獻天祚章



奴見淳不從誘草寇數百攻掠上京取府庫財物至祖  
州率僚屬告太祖廟云我大遼基業由太祖百戰而成  
今天下土崩竊見興宗皇帝孫魏國王淳道德隆厚能  
理世安民臣等欲立以主社稷會淳適好草甸大事未  
遂邇來天祚惟耽樂是從不恤萬機強敵肆侮師徒敗  
績加以盜賊蜂起邦國危于累卵臣等忝預族屬世蒙  
恩渥上欲安九廟之靈下欲救萬民之命乃有此舉實  
出至誠冀累聖垂祐西至慶州復祀諸廟仍述所以舉  
兵之意移檄州縣諸陵官僚士卒稍稍屬心時饒州渤  
海及侯槩等相繼來應衆至數萬趨廣平淀其黨耶律  
女古等暴橫不法劫掠婦女財畜章奴度不能制內懷  
悔恨又攻上京不克北走降虜上順國女直阿鶻產率  
兵追敗之殺其將耶律彌里直擒貴族二百餘人其妻  
子配役繡院或散諸近侍爲婢餘得脫者皆遁去章奴  
詐爲使者欲奔女直爲邏者所獲縛送行在伏誅  
耶律朮者字能典于越蒲古只之後魁偉雄辨乾統初  
補祗候郎君六年因柴冊加觀察使天慶五年受詔監  
都統耶律幹里朶戰及敗左遷銀州刺史徙咸州糾將  
嘗與耶律章奴謀立魏國王淳及聞章奴自鴨子河亡  
去卽引麾下數人往會之道爲游兵所執送行在所上

問曰予何負卿而反术者對曰臣誠無憾但以天下大亂已非遼有小人滿朝賢臣竄斥誠不忍見天皇帝艱難之業一旦土崩臣所以痛入骨髓而有此舉非爲身計後數日復問术者厲聲數上過惡陳社稷危亡之本遂殺之

論曰遼末同事之臣其善惡何相遠也棠古骨鯁不屈權要兩鎮烏古恩威並著酬幹平亂渤海又以討叛力戰而死忠可尚矣得里底縱女直而不討寢變告而不聞其蔽主聰明爲國階亂莫斯之甚也章奴术者乘時多艱潛謀廢立將求寵幸以犯大逆其得免於天下之

戮哉

遼史卷一百一  
列傳第三十一

遼史卷一百終

遼史卷一百一

列傳第三十一

元闕府儀同三司上柱國前中書右丞相兼修國史都總裁脫脫修  
皇明奉訓大夫右春坊右諭德兼翰林院侍講署學監事臣沈淮等  
奉

勅重校刊

蕭陶蘇幹

耶律阿息保

蕭乙薛

蕭胡篤

蕭陶蘇幹字乙辛隱突呂不部人四世祖因吉髮長五  
尺時呼爲長髮因吉祖里拔與隗部節度使陶蘇幹謹  
愿不妄交伯父留哥坐事免官聞重元亂挈家赴行在

萬曆三十四年刊  
遼史卷一百一

通史卷一百一十五  
夏傳  
時陶蘇幹雖幼已如成人補筆硯小底累遷祇候郎君  
轉樞密院侍御咸雍五年遷崇德宮使會有訴北南院  
聽訟不直者事下陶蘇幹悉改正之爲耶律阿思所忌  
帝欲召用輒爲所沮八年歷漠北滑水馬羣太保數年  
不調嘗曰用才未盡不若閑乾統中遷漠南馬羣太保  
以大風傷草馬多死鞭之三百免官九年徙天齊殿宿  
衛明年穀價翔踊宿衛士多不給陶蘇幹出私廩調之  
召同知南院樞密使事天慶四年爲漢人行宮副部署  
時金兵初起攻陷寧江州天祚召羣臣議陶蘇幹曰女  
直國雖小其人勇而善射自執我叛人蕭海里勢益張

我兵久不練若遇強敵稍有不和諸部離心不可制矣  
爲今之計莫若大發諸道兵以威壓之庶可服也北院  
樞密使蕭得里底曰如陶蘇幹之謀徒示弱耳但發滑  
水以北兵足以拒之遂不用其計數月間邊兵屢北人  
益不安饒州渤海結構頭下城以叛有步騎三萬餘招  
之不下陶蘇幹帥兵往討擒其渠魁斬首數千級得所  
掠物悉還其主及耶律章奴叛陶蘇幹與留守耶律大  
悲奴爲守禦章奴既平陶蘇幹請曰今邊兵懈弛若清  
暑嶺西則漢人嘯聚民心益搖臣愚以爲宜罷此行不  
納乃命陶蘇幹控扼東路招集散卒後以太子太傅致

仕卒

耶律阿息保字特里典五院部人祖胡劣太子時徙居西北部世爲招討司吏阿息保慷慨有大志年十六以才幹補內史天慶初轉樞密院侍御金人起兵城境上遣阿息保問之金人曰若歸阿踈敢不聽命阿息保具以聞金兵陷寧江州邊兵屢敗遣阿息保與耶律章奴等齎書而東冀以脅降阿息保曰臣前使依詔開諭畧無所屈將還謂臣曰若所請不遂無相見今臣請獨往不聽將行別蕭得里底曰不肖適異國必無生還願公善輔國家旣至阿息保見執久乃遁歸及天祚敗績遷

都巡捕使六年從阿踈討耶律章奴加領軍衛大將軍阿踈將兵而東阿息保送至軍乃還天祚怒其專鞭之三百尋爲奚六部禿里太尉後阿踈反阿息保以偏師進擊臨陣墜馬被擒因阿踈有舊得免時阿踈頗好殺阿息保謂曰欲舉大事何以殺爲由是全活者衆會阿踈敗乃還以戰失利囚中京數歲保大二年金兵至中京始出獄尋爲敵烈皮室詳穩是時魏王淳僭號屢遣人以書來招阿息保封書以獻因諫曰東兵甚銳未可輕敵及石輦鐸之敗天祚奔竄召阿息保不時至疑有貳心并怒爲淳所招殺之初阿息保知國將亡前後諫

甚切及死以非罪人尤惜之

蕭乙薛字特免國舅少父房之後性謹愿壽隆間累任劇官天慶初知國舅詳穩事遷殿前副點檢金兵起爲行軍副都統以戰失利罷職六年出爲武定軍節度使遷西京留守明年討劇賊董龐兒戰易水西大破之以功爲北府宰相加左僕射兼東北路都統十年金兵陷上京詔兼上京留守東北路統軍使爲政寬猛得宜民之窮困者輒加振恤衆咸愛之保大二年金兵大至乙薛軍潰左遷西南面招討使以部民流散不赴及天祚播遷給侍從不闕拜殿前都點檢凡金兵所過諸營敗卒復聚上京遣乙薛爲上京留守以安撫之明年盧彥倫以城叛乙薛被執數月以居官無過得釋後爲耶律大石所殺

蕭胡篤字合木隱其先撒葛只太祖時願隸官分遂爲太和宮分人曾祖敵魯明醫人有疾觀其形色卽知病所在統和中宰相韓德讓貴寵敵魯希旨言德讓宜賜國姓籍橫帳由是世預太醫選子孫因之入官者衆胡篤爲人便佞與物無忤清寧初補近侍大安元年爲彰愍宮太師壽隆二年轉永興宮太師天慶初累遷至殿前副點檢五年從天祚東征爲先鋒都統臨事猶豫凡

隊伍皆以圍場名號之進至刺離水與金兵戰敗大軍亦却及討耶律章奴以籍私奴爲軍遷知北院樞密使事卒胡篤長于騎射見天祚好游畋每言從禽之樂以逢其意天祚悅而從之國政隳廢自此始云論曰甚矣承平日久上下狃於故常之可畏也天慶之間女直方熾惟陶蘇幹明於料敵善於忠諫惜乎天祚廝蔽不見信用阿息保不死阿疎之難乙薛甘忍盧彥倫之執大節已失他有所長亦奚足取胡篤以游畋逢迎天祚而隳國政可勝罪哉

遼史卷一百一終

遼史卷一百二

列傳第三十二

元祚 司上柱國前中書右丞相兼修國史都總裁脫脫修皇明 奉訓大夫右春坊右諭德兼翰林院侍講署國子監事臣沈淮等

奉

勅重校刊

蕭奉先

李處溫

張琳

耶律余覲

蕭奉先天祚元妃之兄也外寬內忌因元妃爲上眷倚累官樞密使封蘭陵郡王天慶二年上幸混同江釣魚故事生女直酋長在千里內者皆朝行在適頭魚宴上

使諸酋次第歌舞爲樂至阿骨打但端立直視辭以不能再三旨諭不從上密謂奉先曰阿骨打跋扈若此可託以邊事誅之奉先曰彼麤人不知禮義且無大過殺之傷向化心設有異志蕞爾小國亦何能爲上乃止四年阿骨打起兵犯寧江州東北路統軍使蕭撻不也戰失利上命奉先弟嗣先爲都統將番漢兵往討屯出河店女直乃潛渡混同江乘我師未備擊之嗣先敗績軍將往往遁去奉先懼弟被誅乃奏東征潰軍逃罪所至劫掠若不肆赦將嘯聚爲患從之嗣先詣闕待罪止免官而已由是士無鬪志遇敵輒潰郡縣所失日多初奉先誣耶律余覲結駙馬蕭昱謀立其甥晉王事覺殺昱余覲在軍中聞之懼奔女直保大二年余覲爲女直監軍引兵奄至上憂甚奉先曰余覲乃王子班之苗裔此來實無亡遼心欲立晉王耳若以社稷計不惜一子誅之可不戰而退遂賜晉王死中外莫不流涕人心益解體當女直之兵未至也奉先逢迎天祚言女直雖能攻我上京終不能遠離巢穴而一旦越三千里直擣雲中計無所出惟請播遷夾山天祚方悟顧謂奉先曰汝父子誤我至此殺之何益汝去母從我行恐軍心忿怒禍必及我奉先父子慟哭而去爲左右執送女直兵女直



兵斬其長子昂送奉先及次子昱於其國王道遇我兵奪歸天祚竝賜死

李處溫析津人伯父儼大康初爲將作少監累官叅知政事封滌水郡王雅與北樞密使蕭奉先友舊執政十餘年善逢迎取媚天祚又寵任之儼卒奉先薦處溫爲相處溫因奉先有援已力傾心阿附以固權位而貪汚尤甚凡所接引類多小人保大初金人陷中京諸將莫能支天祚懼奔夾山兵勢日迫處溫與族弟處能子奭外假怨軍聲援結都統蕭幹謀立魏國王淳召番漢官屬詣魏王府勸進魏國王將出奭乃持赭袍衣之令百

官拜舞稱賀魏王固辭不得遂稱天錫皇帝以處溫守太尉處能直樞密院奭爲少府少監左企弓以下及親舊與其事者賜官有差會魏國王病自知不起密授處溫番漢馬步軍都元帥意將屬以後事及病亟蕭幹等矯詔南面宰執入議獨處溫稱疾不至陰聚勇士爲備紿云奉密旨防他變魏國王卒蕭幹擁契丹兵宣言當立王妃蕭氏爲太后權王軍國事衆無敢異者幹以后命召處溫至時方多難未欲卽誅但追毀元帥劄子處能懼及禍落髮爲僧尋有永清人傅遵說隨郭藥師入燕被擒具言處溫嘗遺易州富民趙履仁書達宋將童

貫欲挾蕭后納土歸宋后執處溫問之處溫曰臣父子  
於宣宗有定策功宜世蒙宥容可使因讒獲罪后曰向  
使魏國王如周公則終享親賢之名於後世誤王者皆  
汝父子何功之有并數其前罪惡處溫無以對乃賜死  
爽亦伏誅

張琳潘州人幼有大志壽隆未爲秘書中允天祚卽位  
累遷戶部使頃之擢南府宰相初天祚之敗於女直也  
意謂蕭奉先不知兵乃召琳付以東征事琳以舊制凡  
軍國大計漢人不與辭之上不允琳奏曰前日之敗失  
於輕舉若用漢兵二十萬分道進討無不克者上許其

半仍詔中京上京長春遼西一路計戶產出軍時有起  
至二百軍者生業蕩散民甚口之四路軍甫集尋復遁  
去及中京陷天祚幸雲中留琳與李處溫佐魏國王淳  
守南京處溫父子召琳欲立淳爲帝琳曰王雖帝胄初  
無上命攝政則可卽真則不可處溫曰今日之事天人  
所與豈可易也琳雖有難色亦勉從之淳旣稱帝諸將  
咸居權要琳獨守太師十日一朝平章軍國大事陽以  
元老尊之實則不使與政琳由是鬱悒而卒

耶律余覲一名余都姑國族之近者也慷慨尚氣義保  
大初歷官副都統其妻天祚文妃之妹文妃生晉王最

賢國人皆屬望時蕭奉先之妹亦爲天祚元妃生秦王奉先恐秦王不得立深忌余覲將潛圖之適耶律撻葛里之妻會余覲之妻於軍中奉先諷人誣余覲結駙馬蕭昱撻葛里謀立晉王尊天祚爲太上皇事覺殺昱及撻葛里妻賜文妃死余覲在軍中聞之懼不能自明被誅卽引兵千餘并骨肉軍帳叛歸女直會大霖雨道途留阻天祚遣知奚王府蕭遐買北宰相蕭德恭大常衮耶律諦里姑歸州觀察使蕭和尚奴四軍太師蕭幹追捕甚急至間山及之諸將議曰蕭奉先恃寵蔑害官兵余覲乃宗室雄才素不肯爲其下若擒之則他日吾輩皆余覲矣不如縱之還給云追襲不及余覲旣入女直爲其國前鋒引婁室孛革兵攻陷州郡不測而至天祚聞之大驚知不能敵率衛兵入夾山余覲在女直爲監軍久不調意不自安乃假遊獵遁西夏夏人問汝來有兵幾何余覲以二三百對夏人不納卒

論曰遼之亡也雖孽降自天亦柄國之臣有以誤之也當天慶而後政歸后族奉先阻天祚防微之計陷晉王非罪之誅夾山之禍已見於此矣處溫逼魏王以僭號結宋將以賣國迹其姦佞如出一軌嗚呼天祚之所倚毗者若此國欲不亡得乎張琳妮妮守位余覲反覆自



